



竹堂類稿卷一

楚辭

琴操六章

鳳皇來儀

鳳皇兮于飛翔翔兮雲達聖人治兮垂衣攬德輝  
兮來歸抱文章兮自竒紛五色兮陸離明堂開兮  
受釐世康樂兮人熙羽其用兮為儀威光耀兮四  
裔

幽蘭

幽蘭兮無言叢生兮空谷衆草縟兮爭榮汝何為



乎幽獨嗟春風兮不來傷美人兮遲暮抱余情兮  
信芳終不改乎初度

白雪

皇天仁愛兮惠我蒸民曰寒而寒兮萬里同雲千  
巖積素兮六合生春非珠非玉兮稼穡維珍父老  
喜兮簫鼓陳報田祖兮享蜡神歲豐樂兮民和親  
臚萬福兮頌一人

高山流水

山不言高水不言深四海雖大知心幾人周公握  
髮禮羅庶士平原信陵士為之死峩峩岱宗上有

喬松蒼鱗赤甲如虬如龍小草耿介叢生其下含  
貞抱獨蕭然在野女雖無媒亦醜境垣士雖無聞  
亦樂邱園盱衡六宇言求其侶悠悠我心抗懷邃  
古

綠水

猗春水之方生兮渙百畝之方塘滋洲中之杜若  
兮蘼陌上之垂楊嗟江深而漢廣兮彼美人其一  
方將褰裳而從子兮歎欲濟以無梁

桂之樹

桂之樹兮連蜷繁陰翳兮山巔酌天漿兮如醴仙

選

人服兮駐顏海之外兮三山訪壺嶠兮求仙沂滄  
波兮渺無外靈槎逝兮歸何年

熱芝歎 傷芷生而作也

龍門之桐高千尋兮下有靈根紫芝生兮一跗九  
莖狀輪囷兮含章在中輝光兮異文秀質舉世  
以為祥兮芳聲既騰錫貢明堂兮衆草非伍唯蕙  
為友兮非棟非梁植諸圃兮凌霜抱雪久將朽兮  
萋萋空谷蕭艾為羣兮荒煙翳鬱爰燭蒸兮樵蘇  
不察野火熱兮朝榮夕萎生何為兮作歌告哀我  
心孔悲兮

放鶴招鶴歌

鶴鳴兮九臯將翔將翔兮雲霄南山南兮北山北  
鶴其去兮逍遙緇袂兮縞衣遙曾擊兮孤飛雲溶  
溶兮碧落山蒼蒼兮翠微翠微兮碧落千巖兮萬  
壑鶴之游兮不歸山中兮寂寞  
鶴兮歸來爾毋遠舉乎冥冥被罡風之浩浩兮爾  
之去兮零丁鶴兮歸來爾毋游乎大荒渺平沙之  
無垠兮曾不如乎莽蒼嗟山深而林密兮又草香  
而泉潔歸來歸來兮山中有千年之秘室

選

哀湘曲

我所思兮瀟湘秋月澹兮無光蕙之帶兮荷裳思  
嬋娟兮不能忘津欲濟兮無梁酌金尊兮玉漿倚  
招我兮洞房夜如何兮未央視銀漢兮徬徨命不  
猶兮恩絕歡不永兮恨長雉何愛兮朝媒鳩何媚  
兮夕張秋水生兮湘之湄靈風來兮兩旗沙棠舟  
兮桂楫願溯洄兮從之窈窕兮招予誓百歲兮為  
期彼美粲兮無言吹瑤笙兮參差悲遠遊兮無侶  
將攜手兮同歸望九嶷兮何處瓊為梯兮琳為宇  
風蕭蕭兮將夕雲冥冥兮欲雨解余佩兮山柰棄  
余珉兮江渚美人暮兮不歸湘之波兮容與悲風

起兮洞庭抱愁心兮終古

湘江送別圖賦送韓二觀察崑還吳

春風澹兮將歸瑤草碧兮千里擊蘭楫兮中流湘  
之波兮如綺餞之子兮江皋跋故鄉兮若咫折楊  
枝兮未青望停雲兮四起

雜言詩

演禽言四章

布穀

布穀布穀新秧滿田綠春耕夏耘秋不熟催租人  
來廩無粟城中歌舞村中哭

泥滑滑

泥滑滑泥深沒肝不可拔東鄰婦采桑西鄰婦采  
茶綠簾遮雨若纏髮兩後春山花亂發勾欄鋪地  
紅。鑿。輸。金。縷。作。鞵。錦。作。鞵。不。知。春。山。路。何。况。春。泥  
滑。

不如歸去

不如歸去春山欲暮濛濛白楊花中有旅人墓墓  
木高十尋子孫不知處

行不得也哥哥

行不得也哥哥今人平地生風波虎豹觸網鷹觸

羅。爪。牙。雖。利。將。誰。何。綠。林。有。豪。客。霍。霍。刀。新。磨。哥  
哥哥傷子寔多

石尤歌

石尤石尤爾將令人勿遠游奈何阻我江上之歸  
舟江風獵獵吹不已懸旌搖搖西北指江風西北  
吹江水東南流儂家遙在胥水頭歸塗阻且修對  
面之舟疾于矢行者歡喜守者愁石尤風不休令  
我生煩憂

行路難

四座客勿喧聽我高歌行路難解我生好行役東

髮游幽燕幽燕三千里游者動經年二出門春水  
生入門秋月明春秋暗中換何以成令名三皇天  
雨不止泥深沒我馬馬畏泥塗不肯行行人信宿  
郵亭下四浩浩江河非舟不渡迴風生瀾阻我歸  
路五藏金于橐謂無人知綠林豪客睥睨路歧六  
綏綏山中孤變化成美女炫服倚市門願言結佳  
侶解人言故鄉好我非樂此間關道終歲饑來驅  
我行千山萬水垂垂老解

選

讀明御史陳忠潔公年譜書後

公名純德零陵人崇禎末官福建道監察

御史提督北直學政殉甲申之難順治十

二年查辦明末殉難諸臣謚忠潔

聖人大無我褒及勝國臣勝國社稷亡於甲申殉

難而死二十二人謂君死社稷臣敢不死其君一

我

朝龍興值有明之衰盪寇收京日月重開史官上

其事

帝曰都哉以享以謚慰彼泉臺二御史臣純德實

產荆楚曰忠曰潔有

詔曰可忠人所同潔則公獨武譬諸白璧纖瑕弗



宛三解忠臣致身豈曰為名名亦不可滅惟德斯馨

當公未死有必死心諒之於父母信之於友朋四解

賊逼潞河龍門無援公方巡方豸衣繡幘堅冰在

鬚驚沙撲面守陴而哭如巡如遠五解公出易水賊

破燕關慷慨赴義文山壘山禹湖龍去爰攀其髯

蕭蕭城南碧血爛編六解忠臣死忠弗克全孝儲儲

二老馳尺書以告父母得書弗號而笑有子如此

可以云肖七解有譜藏於家自編其年總角而岐嶷

讀書日萬言雖晚而達功烈炳然采風者來請視

斯編八解

四言詩

游子吟

日落風起羣鳥亂飛陟彼崇邱遙望故扉浮雲如

蓋卷我庭闈京華雖樂不如南歸溪有荇藻山有

蕨薇薄言采之可以療饑家有板輿勝于駢駢金

貂爛然不如萊衣平沙迢迢密雪霏霏嗟哉游子

境與心違

歲寒三友圖為潘古堂題

蕭蕭草廬左松右竹中有幽人讀書硯北竹生鳳

吹松作龍文歲寒良友如此兩君豈惟歲寒春秋

佳日兩海風晴無之不適載為轉語敬祝先生與  
松同壽與竹同清

穹窿道士王秋谷一邱一壑圖

山虛水深風高木落此中有人遺羣立獨蒼崖插  
天上有飛瀑流泉在山不染五濁綠草如茵左右  
脩竹抱膝無言脩然意足萬物芻狗百年風燭撫  
濟道真歸於太樸

五言古詩一

庭中有嘉樹

庭中有嘉樹亭亭挺勁姿故葉未曾脫新綠生間

之微風動其柯深淺相參差清陰密如幄凝碧當  
檐楣主人惜此樹頗勝他花枝花開有時謝此樹  
長華滋

晚晴

風吹濕雲散夕陽在修竹竹色綠于染濃陰菴茅  
屋偶逢磻石坐且就餘光讀孤雁扶雲飛衆鳥爭  
巢宿壯士惜遲暮野人愛幽獨

蘇門六子詩

張邦弼補梧

翩翩張孝廉馳譽風雅場胡為二十年辱在諸生

行家無錙銖蓄賓客時滿堂狹巷擁車騎長筵羅  
酒漿偶說出世法妙諦參空桑如游蒼苔林鼻觀  
無餘香我願同西歸稽首楞嚴王

沈起鳳賞漁

江南有詞人自號紅心客篇篇新樂府畫遍旗亭  
壁天生風雅才寓意霓裳拍雖工鬱輪調恥入岐  
王宅言泉波瀾壯菽苑叮哇闢偶然說經義盡掃  
諸生籍紛綸出奇解奪我五花席

趙基葯亭

鴨漪有亭長枕藉經史中落筆生珠璣萬紙無雷

同室中藏婬娟校書天性工扁舟坐若仙雙笈凌  
春風家居青灘上涵跡漁釣叢賦詩述風俗餘技  
寄雕蟲有子讀父書雛鳳聲雖雖

景莢秋浦

琴川有公子家住梅花里梅花伊前身詩格清如  
此金剛一卷經持誦蕭齋裏橫空花雨來香色皆  
塵爾與子三歲別別緒不可理願言溯洄之伊人  
隔秋水

王芑孫鐵夫

鐵夫真鐵漢其詩亦鐵體博物通齊諧談天習周

駢讀書楨其艷鉛華必淨洗獻賦  
承明廬姓名達

丹陛遨游公卿間分庭與抗禮屢陳孺子榻常設  
穆生醴黃金出贈人歸食鹽與薺道逢輕薄子抗  
顏相訶詆逢我結客場布衣如弟弟

沈清瑞芷生

騷人愛香草芷者蘭之侶以之方伊人芬芳固其  
所吳興有才子清才天所與聰明若冰雪咳唾無  
凡語五經義紛綸組織出機杼誰歟識佳士當代  
有燕許芷生早出石  
菴尚書之門

選

秋暮登席邱

去郭不數里忽然見巖壑遙天一峯秀寒野羣木  
落良辰結儔侶共赴林泉約跨澗渡危梁凌崖登  
飛閣探雲巖際行落日池上酌古寺伏馴席空林  
鳴野鶴興闌尋歸路冠蓋影交錯近關辨燈火聯  
袂入城郭寄語塵中人及時早行樂

小吳軒

飛樓躡崔巍全吳瞭如掌一城踞其中羣山色蒼  
莽平疇開稻花空潭撒魚網吳都魚米鄉此福齊  
民享曲磴深翠中良辰每孤往

選

和清遠道士詩

虎邱有石刻清遠道士詩顏魯公書其詩  
謂生殷周歷秦漢大都寓言也

清遠何許人其言若河漢不作三山游而此邱中  
竄豈伊滑稽流不恭與世玩踪跡托既詭詩篇與  
亦湯偶尋放鶴臺獨坐釣魚岸千花林氣香一雨  
泉聲亂古塔浮雲中幽崖夕陽半巖壑歷今古游  
人幾聚散日月雙輪馳匆匆變昏旦生天悼康樂  
歸隱憫張翰山林與朝市泯沒均所嘆世豈有神  
仙母乃虛詞贊

齋前五君詠

石曰介如君

石者山之骨天地結靈氣崢嶸一卷多乃具崑崙  
勢中有珪璋材待人琢成器琮瑤璜璠璣曰國  
之瑞其餘雖碌碌良工不忍弃煉之補天庭光華  
五色織

水曰澹明君

止水無波瀾激之則流駛清水無淤泥撓之則濁  
起萬物凶乎動其機有如此靜者心淵然何地容  
渣滓

竹曰有斐君

震為蒼筤竹初生纖如錐春雷一聲鳴旦暮陰  
襪綠條翠靈柯環吾讀書籙良夜清風來如聞吹  
參差摩天不少屈凌霜不少哀竹中有佳人其節  
彷彿之

蘭曰香君

美人愛香草繞屋樹蘭蕙春風茁其芽芳菲襲衣  
袂修莖孤玉立仙露聯珠綴谷中有衆草凌晨手  
與雜寄語采蘭人不祥當被襖

鶴曰九臯君

鶴本鸞鳳羣胡為邱壑中雖生凌霄翼未逢閭闔  
風孟水斗糲稬飲啄凡鳥同千年息毛羽對客甘  
鐘鏐主人心惻然放還蓬萊宮仙子拂拭之軒軒  
凌蒼穹縞衣耀霜雪孤頂丹砂紅迴身謝主人天  
地如樊籠

苦熱

天地如洪鑪萬物任所投堅剛如干鏌百煉繞指  
柔人生非金石當此難久留願言御高風遐舉雲  
霄頭迴看環海波萬里滄滄流長嘯凌虛空泠然  
天地秋

天此  
崇明張景謀秀才廬舍為潮水漂壞走筆慰  
之

我聞柱史言飄風不終朝此義未圓滿積疑誰與  
消大塊散噫氣林壑羣怒號鬱久勢必宣調調復  
刀刀六月月既望迎秋出西郊崇朝秋氣達六合  
鼓商飈東南古澤國昏旦候汐潮風水猛相激湧  
泝湧波濤海乃百谷王四瀆無不朝岷江萬里來  
湯湯達金焦海門扼其要高廖雙嶠嶢龜鼉蹋波  
游鯨鯢挾浪驕芒芒平洋沙百雉建麗譙陽侯肆  
其威胥母揚其鏹城南有處士廬舍遭漂搖杜陵

古賢者秋風敗茅屋室家且綢繆勿爾音曉曉况  
乎夸亭潮佳讖傳吳謠或者徵瑞應君將奪錦標  
題角里先賢畫冊

曖曖城東南有村曰角里居人聚萬家襟帶吳淞  
水里中者舊名唐以前尚矣粵稽唐以來作者天  
隨始荒廬杞菊中泛宅烟波裏其後繁有徒風流  
相繼起遐思古之人左圖右則史圖以傳其真史  
以傳其是蒐羅屬後賢稱揚重先美曠古懷賢詰  
述德尊祖禰旁及緇黃流一一存端委窮達事殊  
途後先道同揆裝池煥緇帙臚列登藜几輝映雖

一隅流傳必千紀此鄉文獻徵諸賢長不死後之  
視令人想望有如此

過程山人逸園隱居

繞山植花木幽徑無人聲忽聞樵斧響知有人經  
行松下遇磐石雨餘苔蘚生久行筋力倦暫息良  
怡情山花滿路香欲采亡其名獨坐苦無侶漫款  
山人荆山人禮數生拱手作送迎時或問塵事少  
見多所驚坐對不知久茅舍聞雞鳴

渡易水

杖策邁燕趙行旌西北指驅車易水湄易水清無

滓纖鱗戲波中香草紛蘭芷爽鑑毛髮餘寒沁心  
脾裏游子別故鄉登山復臨水揚舲江之臯挂席  
河之涘平沙杳無人不知幾千里凌晨止川上一  
洗風塵矣我生際

清時束髮親書史臨流賦新詩不學悲歌士

將入都門望西山積雪

登山知山峻入山知山深山外覽山勢彌見山嶙  
峴天地清淑氣磅礴無古今秀靈鍾西北名岳世  
所欽綿亘數百里爰起高千尋岡迴勢蜿蜒壁立  
形寄嶽叢菁猛虎伏隔崦悲猿鳴大塊孕萬有空



谷足衆音中峯高且寒不與人登臨飄風望秋發  
羲暉當晝沈積雪經歲年彷彿臚瓊琳連山疊瓊  
岳羣木開瑤林忽然絢金碧梵宇藏山陰寶幢光  
燦燦香樹陰森森曰余遊京華不忘邱壑心烟霞  
易軒冕羨彼山阿人

豐臺芍藥

春從天上來衆卉爭芬芳茲花餞餘春婪尾名相  
當密葉聯翠衽交枝鬥紅粧積雨坼香苞清露滴  
花房况植

帝王都雨露先他方青門賣花翁朱顏鬢絲蒼凌

晨入城市芳菲滿筠筐植之金瓶中置之繖几旁  
錫以近侍名富貴隨花王

止酒

聖人疎甘酒仙人厭狂藥肥甘腐我腸而况貪盃  
杓萬事貴知足人身非谿壑胡為金玉相坐令成  
糟粕我年十四五英姿抗褒鄂當筵鬥酒兵一呼  
十人却衆客皆號呶主人儘脫畧飲如吸百川禮  
豈拘三爵偶逢花月晨席地天為幕靜聽黃鸝鳴  
一盃破寂莫他鄉遇友生促膝相酬酢歡然道平  
生密語雜諧謔一切酒中趣當境殊不惡豈知醉

鄉裏麴生乃為虐始也酒入唇陶然頗自樂逡巡  
入醕酌觥籌漸交錯雙眸眩生花四體失所托心  
旌忽搖搖言泉尚諤諤淳于一石醉平原十日酌  
頽然玉山倒四海馳魂魄既醉亦已醒累日猶作  
惡股肱或不仁肺腑自焦灼世上沈酒人傷生若  
鋒鏑我有千金寶胡為坐銷鑠戒律持不嚴狂瀾  
終復作繼今斷涓滴言出如山岳有酒如鴆毒有  
盃如鼎鑊玉池生清水終朝長不涸

與顧林橋夜話

北風吹行雲應向江南去游子望故鄉故鄉不知

處出門柳未青雨雪今如絮薄寒侵人衣傲裘不  
在御京華多貴人鴻鸞鳳亦翥雞狗爭勝場文章  
馳妙譽嗟予枯槁人儒俠兩無與執箸畫寒灰擁  
爐夜深語

瓜渚放舟至郭璞墓飲中冷泉述事二十韻

嵯峨江上山地脉岷峰來江心一峰峙排出金銀  
臺其下結靈秀藁葬神仙骸神仙偶游戲羽化忘  
胚胎豈有後艱慮亂石葺崔嵬平生註山海六合  
恣徘徊而此卜窀穸解脫真仙才蘧廬有天地安  
用土一杯叶扁舟振旋渦繫纜青山隈孤墳渺碑

碣蒼莽生蒿萊泠泠中冷水第一古所推俗子汲  
凡水舊說翻疑猜山人製竒器其器如尊壘腹可  
受升斗雙紐蟠靈虺銅丸鎮其中設機以閉開放  
舟湖中流一勺波滌泗百丈引修綆龍窟探源回  
芬芳沁肺腑不數瓊漿盃世不有盧陸此味誰知  
哉

鹿城縣齋

童年釣游地十載復來此山城若彈丸青山塞城  
裏歲晏人事稀蕭齋清若水疎林鳥爭巢虛窗雪  
鳴紙松花滿地黃籐葉緣牆紫枯坐斗室中捲簾  
時隱几夜帶衣裳眠晨先鳥鵲起米鹽付僮僕平  
安報妻子天地如吾廬何處非鄉里

對玉山獨坐有作

山色入簾來坐中眉宇綠忽聽樵唱諫有人住空  
谷孤峰若蹲獅石色潔如玉梵宇踞其巔環山植  
羣木鳥爭高樹巢僧結懸崖屋濃烟生樹中山舍  
晨炊爨

古別離

寒犬深巷吠行人中夜起束裝戒僕夫丁寧語妻  
子解錦被雙鴛鴦良人遊遠方羅帳掩秋月金爐

消夕香解妾是園中柳君是風中絮柳色經秋衰  
絮飛不知處解三集狐不成裘斧冰不成糜歲暮他  
人歸良人將何之解四幽室焚蘭膏清尊陳綺席今  
宵同夢人明朝遠行客解五

得林毓奇孝廉函問

天道福善人顏淵竟夭死造物何所私修短偶然  
耳良士不蒙福古今類如此此理不可知欲問向  
誰是

美玉無纖瑕之子生廉讓束身名教中抗志青雲  
上粹然百行備蔚為儒宗望行年未四十嗒爾遭

天喪富貴如浮雲夭壽亦空相所嗟典型亡令我  
增悽愴

鍾王去人遠書學久荒蕪後生不識字率爾思操  
觚老生病兔守俗學嗤鴉塗斯人起後塵超越追  
前趨六書資變化八法勤規撫匠心苦經營波磔  
鋒稜殊此事今遂廢拊膺生長吁

仲冬之月八日自和州歸里

崢嶸歲將暮旅人懷故鄉耿耿夜不寐晨起戒嚴  
裝籃輿出郭門初日照城隍遙望江南岸烟際山  
蒼蒼誰言江水深一葦亦可杭扁舟疾于矢風急

孤帆張驚濤不足惜但惜歸路長

守風花籃套

歲晏牽動息征人勞不已江路候風行霜天辨星  
起嚴風穿窗中密雪入篷底遙夜耿不寐重衾如  
澌水登舟已五夕計程未百里歸途阻且長行邁  
憂靡靡

風止喜而有作

東山日初上大江風浪平榜人有喜色擊楫中流  
行烟消三山出風高一帆輕天寒水歸壑江流淺  
且清鄰舟發櫂歌忽聞吳語聲嗟我懷歸客彌動

故鄉情

自花籃套放舟

清風江上來江水皺如縠波動羣魚行沙明孤鷺  
宿依山辨成樓臨水逢漁屋皎皎已殘雪蒼蒼未  
落木嗟予浪遊人蹤蹟何碌碌扁舟載席帽故徑  
荒松菊豈無懷土情饑來驅我酷努力歸山計考  
槃矢邁軸

暮宿龍江關

朝發采石渚暮宿秣陵渡秣陵非吾土所喜舊遊  
路明明秦淮月光華爛如故故人今不在天邊碧

雲暮迢迢驛路塵。歷歷旗亭樹。孤雁雲中翔。行人  
江上住。恨無雙飛翼。坐使歸期誤。

游永濟寺觀石刻吳道子觀音像

修竹一叢碧。中有齊梁寺。丹楹蓋碧瓦。寮宇凌寒  
翠峭石。嵌豐碑。吳生工繪事。念彼觀音力。肯出慈  
悲意。粵稽龍華會。諸佛叅密諦。菩薩發宏願。普度  
人間世。現身說諸法。皆不可思議。偶化女人身。遂  
傳千萬禩。鬢髮委如雲。瓔珞垂肩臂。種種莊嚴相。  
毫端蘊靈異。我來叅法像。更讀摩崖字。懸崖撒手  
言。妙證菩提義。長生長不死。雖學不可至。區區書

畫禪乃成不朽藝

舟過棲霞山風利不得泊不果登也

我有山水癖。而無山水緣。探幽非無興。動為他務  
牽。放舟龍潭道。遙望棲霞山。大江環其麓。佛宇巢  
其巔。霜林葉未脫。丹翠相新鮮。山石皴瘦透。皴法  
畫不傳。谷鳥翔且鳴。巖阿真悄然。可望不可接。疑  
若登青天。作歌告山靈。問我緣何慳。

七里瀧謁嚴先生祠堂

龍戰昆陽野。鴻飛富春渚。寧知天子尊。但重故人  
語。興王自聖神。諸將多英武。藉使投竿來。雖勞亦

何補何如歸山中相與無相與高懷輕黃屋矧乃  
圭與組

淙淙七里灘上有古釣臺臺高百餘丈山勢鬱崔  
嵬咄哉羊裘翁生抱濟世才故人作天子召之不  
肯來姓名畏人知遯跡荒江隈漢京草昧初經綸  
屯雲雷先生尚其志百奪不可回東都重氣節試  
思誰所培行藏不在跡安用軒冕為

即日

舊綠雜新綠濃淡生竒姿襯之以白雲旁出枯樹  
枝野屋八九椽半瓦半茅茨林罅露遠山淡沲纖

于眉自從摩詰死此意誰能知

夜坐聞雁懷林橋秀才

明月皎如畫流光揚太清空齋坐寂寥忽聞鳴雁  
聲雁聲何雖雖羣侶相和鳴雁飛携其侶游子長  
孤征耿耿夜無寐靜言懷友生霜降水歸壑黃河  
瀏兮清方舟不可濟豈無念子情

登徐州放鶴亭

乘馬出郭門蒼然見山色迴峰聯宛委孤亭表竒  
特行行度翠微步步升盤級憇息坐亭臯豁然開  
胸臆我懷蘇長公四顧尋舊刻舊刻渺無存歲久

風雨蝕今

皇重文學稽古補其闕

天藻壽琬琰歸然亭中植嗟彼元祐朝黨人受羅  
織孰如我

皇恩遐及宋臣軾

述夢

夜夢有所遇岸然一耆耆蒼顏古衣冠謂是亭林  
叟僕乃前致詞殷勤通姓名豈圖後死者乃得見  
先生先生乃言曰子有著述無知巧守其拙知慧  
守其愚僕出所著書一卷不盈寸願從有道者一

一相質証先生喟然言道若大路然後生尋墜緒  
何以通幽元老馬頗識塗與子剖真詮學以正者  
崇事以信者傳子勿喜新奇而勦荒唐說子勿侈  
看皇而為綺靡筆斯文天未喪微言久不絕言不  
足載道徒爾虛車飾

北橋

稽古黃石公著書成一家欲授無其人世士如泥  
沙留侯方亡命銳氣待時動公乃三挫之小忍成  
大勇莽莽穀城山空谷多悲風秦亡楚亦滅神州  
歸沛公區區報韓公始計終成空



燕子樓

燕燕尾涎涎雙雙棲玉樓翩翩張公子做儻多風  
流美人常怨別明月常悲闕妾貌嬌如花妾心潔  
如雪妾死且不避零丁安足論良會難再期盛顏  
非久存孤館閉婵娟甘心就泯沒相逢地下時不  
改舊顏色

九九消寒圖館課

寒燠相乘除日從南至始探筴生一陽吹律得半  
子冬者歲之餘日月窮次紀分陰少當惜寸晷增  
亦喜美哉消寒圖沿自都人士瑤枝恣詰屈冰蕩

工樞擬數及九九窮功從一一起位置耦妃奇點  
染表徹裏一日不可無幾生修到此聰明寄冰雪  
輿臺視桃李一枝本清和五出漸積繁當其功成  
時四海皆春矣

題時帆前輩山寺說詩圖

俛仰天地間觸處皆妙義拈之以為詩會心非擇  
地先生今作者汲古窮其邃家藏詩一龕羣雅寔  
蒼萃學詩如學佛以靜生其慧靜中視羣動一一  
若神契說詩如說法瀾翻出新意一言造元微其  
餘可吐棄偶為山寺遊繪圖識其事唐賢三昧法

有此不傳秘我聞第一乘妙在不思議不從緣覺  
入不假聲聞致乃至無語言何況及文字萬物于  
我心有染皆成累不如盡掃除默守靈臺思真詩  
不在詩詩在無詩際

漢陽朱孝女詩

風人賦鵲巢所託有微意女居父母家原屬寄生  
地先聖去人遠斯道日凋墜嫁殤以為貞孝者乃  
不字不字雖不可然亦人所難婦人外所生動作  
秦越觀吁嗟蝮螫詩媮俗良可歎漢臯有靜女愛  
親出天性與親誓相守婉孌謝媒聘親在承其歡

親歿致其敬掃室祀二人焚香習禪靜鄉人繪為  
圖左椿右則萱椿萱有時悴女心終不讓瑣瑣巾  
幘儔有此異行存所司告于朝綽楔旌其門閨門  
風化始柱下職討論作歌告方來此亦邦之媛

時帆前輩促徵詩話走筆作五言三十韻報

之

衆木生在山操斤需國工飛鴻逝無影餘雪留其  
蹤古今有文獻吾道繫窮通誰扶大雅輪坐使壇  
坵崇我思當代彥第一漁洋翁斯文為己任提唱  
開宗風譬諸衆樂合八音協笙鏞又如水歸海洪

纖悉包容著作高等身健筆摩秋穹上述柱下編  
掌故星羅胸下及鄉曲士接引樞謙冲唐賢貽三  
珠闡幽發其蒙感舊錄遺詩落落臚羣公後生執  
一卷尚友百歲中知人論其世試念誰之功邇來  
士氣靡風雅失所宗偶生一二士彷彿鳴秋虫自  
鳴亦自己疇能與折衷有客叩我門下馬氣如虹  
清言霏玉屑纚纚不可窮蒐羅集百家藏之棟已  
充淵懷尚歛然采及菲與葑惜惜昭德音惠我瑤  
華同一別忽決旬欲徃性苦慵恨不設郵騎晨夕  
傳詩筒新詩絡繹來如入萬卉叢豈無青雲志託

君為附庸但恐錙銖塵無以益岱嵩懷槩述舊聞  
諷誦如瞶矇朱絃奏希聲所幸聽者聰

游萬壽寺謁蓮機上人因看殿後古松茶話

竟日歸而有作

步出西郭門草綠侵人衣尋春不知遠梵宇凌翠  
微山門畫不扃禽鳥心忘機入門叅古德不慈亦  
不威瀾翻出千偈辨者無能違忽聞海濤聲空際  
蒼龍飛如觀張藻畫雙管生枯揮慈雲結為蔭慧  
日揚其輝試叅生枯理生是枯豈非此理不可究  
清言玉屑霏

李少雲明府招飲即席和滄雲給事韻

清風不擇物。吹萬皆成籟。吾曹聚散緣。每出不期會。李侯世所賢。與我昔傾蓋。千里隔魚書。十年證縞帶。良辰集簪裾。高譙臚炙膾。偶開北海尊。暫緩南國旆。客占德星聚。主賦停雲霽。酒多飲不貲。韻險賡無奈。給事倡新篇。落筆如椽大。深心盟金石。妙語謝雕繪。譬諸萬卉中。蒼然見松檜。儒者贈人言。實勝金與貝。我聞古賢侯。訟庭撤鉗鈇。焚香坐燕寢。科頭對林薈。身托兵衛閒。心游簿書外。牧民如牧馬。不過去其害。解衣恤莞獨。持斧攝豪快。嗟

今俗吏治滔滔。若奔瀨。稗政不知芟蠹吏。不知汰如此肉食徒。殊可發一嘅。之子抱遠謨。豈為俗塵肺。平生愷悌心。此行卜孚允。鯁生拙言辭。陳義愧擣昧。將聆百里琴。先計三年艾。欽茲淵岳姿。妾欲効涓壻。願踵龔魯塵。早報循良最。

茅裳清嘯圖為鄭初白叅軍賦

鳳皇九苞瑞其羽。可為儀。翺翔周六合。舉世無人知。蔥蘢春林樹。豈無可棲枝。鴝鷄以為伍。欲集虞差池。蒼蒼蘇門山。白雲與我期。溯洄從伊人。獨抱耿介姿。擗冠芙蓉裳。薜荔為之衣。朱顏遂初服。泉

石恣娛嬉登高嶽清嘯四山皆應之噦然鸞鶴音  
繫人中夜思

鄒城途次遇雨漫成三十韻

輜軒赴閩海杖策出東道崇朝逢驟雨勢如建瓴  
倒僕夫苦怨咨莊衢半行潦皤然道旁叟除穢理  
枯槁戟手告使君此雨勝金寶山東魃為虐大田  
鞠茂草於今歲兩暮曾無此雨好吁嗟叟來前介  
聽使君道介知靈雨零仁愛出大造抑知  
九重心有以感蒼昊今春三輔間雨澤偶稀少初  
夏始得雨風日又炎燥

皇心憫農艱宵旰憂如擣徧告川岳神精誠事祈  
禱飭吏勿征租轉漕積亭堡無籽介何耕無糧介  
何飽縣官悉稱貸事事縈懷抱視介如赤子百計  
登襁褓一切未雨謀綢繆恐弗早

帝心協天心有孚惠非小稼穡古云難介其勸介  
保播琴頌及時勿負

皇恩浩父老拍手言使君語非矯曉人善如是聽  
者誰弗了僕夫蹶然言斯義苦弗討小人食其力  
終歲餐梁稻區區行路難烏足生懊惱歲豐人自  
樂比屋同熙皞驅馬向前行四山新綠繞清風拂

面來炎熇滌如埽

沂州懷古

聖門有狂士。不過志趣大。非如劉阮徒。放浪禮法外。曾歲作聖徒。所志諸賢最。浴沂風舞雩。文乃為辭害。周正未改朔。春王始建子。莫春天尚寒。固無風浴理。考亭守行墨。跡未踐斯里。曰沂有溫泉。附會成其是。豈知耳食言。愈失先民指。翩翩童冠流。大約衣冠士。裸裎邀以嬉。賢者寧樂此。卓哉昌黎翁。讀書發其覆。改浴以為沿。遂闢從來謬。或云諷舞雩。義與詠歸副。仲氏述其辭。仲長統樂志論云諷乎舞雩之下

夫豈無所受寄語。經生家載籍。病墨守讀書先識。

字曠觀窮宇宙。

孔明東方士。邁德疑上聲伊呂。少年遭喪亂。遷流滯

中土。頽仰袁劉輩。謂袁紹袁術劉表。龍臬非可與。塊然卧

隆中。寧與木石伍。大才不虛生。崇朝遇明主。感激

三顧。恩慷慨以身許。翩翩一書生。起家在羈旅。壯

志吞荆襄。逸氣凌飛羽。炎精不再燃。盡瘁終何補。

遙望齊東門。悲歌和梁父。

忠出孝子門。斯言難盡信。不見王睢陵。王祥封一

身臣魏晉。當其奉器。毋蒸蒸慕虞舜。卧冰以求魚。

摯性惇髫齷筮仕甘露聞高名朝野震天子親乞  
言臨雍執爵酌典午移曹社覲顏旅退進曾不思  
舊恩以身為國殉大節既有虧其餘不足訛  
晉士尚虛聲清談誤國事朝無貞亮臣文武如兒  
戲右軍生其間慷慨抱大志勁草抗顏風綢繆不  
知瘁觀其辭世文脩然遺世累行田勸農桑一篇  
三致意世盛崇文教世衰尚功利匡時當有術不  
在多談議今人囿目論相賞在文字何異古愚夫  
賣積明珠棄

即日

糞土乃何物蜣螂轉成丸當其成功時自謂巧力  
殫世人懷嗜好經營不辭難家藏黃金穴志奮青  
雲端百年與之盡視此寧殊觀靈臺徑寸地無欲  
常安安著物即成累靈蠢同一歎

郊城懷古

犧農逝既遠禮失求諸野聖人有不知冲懷問知  
者郊子古建國驟聞舊官制上溯三皇朝下及五  
帝世徵名辨沿革述事表同異秩然一家言至今  
留載記我思洪濛初萬類皆齊觀芸生無貴賤何  
者名為官中古世俗移人情不久安智力乃相御

由漸開爭端。維時聖人出。設官治其奸。論官惟其人。不在法制完。矧彼雲鳥名。不知亦何患。

金焦篇

金山如麗人。臨鏡理粧束。玉顏映繡袿。光艷耀人目。焦山如處士。賦性愛幽獨。孤踪託中流。天許享清福。兩美無短長。強評祇蒙瀆。我從京國來。方舟度其麓。恍逢故鄉人。不語情自屬。欲去轉遲回。翻嫌征權速。作歌告山靈。與之三往復。

七里瀧

朝飲富春水。莫宿桐廬邑。山影雲外微。灘聲雨中

急。觸石衆篙鳴。破浪孤帆濕。我愛嚴子陵。躋堂肅拱。揖周覽南榮。前豐碑若林立。殘銘拂蘚觀。敗屋牽蘿葺。峭壁聳雙臺。危亭覆一笠。飛龍天際翔。屈蠖泥中蟄。相視兩蹇然。俗士豈能及。

選

讀三友張補梧絢春堂詩草偶書其後

春在天地間。杳然不可見。和氣感時動。借花以為絢。春來花不辭。春去花不戀。萬物託太虛。有聚無不散。父母未生時。我方在何處。偶然數十年。氣為形所據。我從空中來。終向空中去。他家男子耳。榮枯我何與。天不與雲期。有雲偶然至。謂雲為無心。



天豈反有意。幻成慶裔姿。光華照天地。瞬息散無踪。兩閒浩然氣。凝水可為冰。化萍不成絮。熟叅生滅理。去非來時處。安有今世因。帶向來世去。此理在眼前。癡人不可語。

鳳皇灘

每逢鳳皇灘。津吏驚相告。銀濤震如霆。迸出兩崖。與亂石抗飛流。怪竒羅衆貌。或累如危碁。或奔如飛礮。或張如屏風。或頽如燬竈。或如珠韞積。或如劍出鞘。或如屋建瓴。或如營樹纛。如鷗矯以飛。如席蹲以麟。如佛面壁。枯如鬼攫人。嘯力爭宇宙竒。

故與波濤杓。蓬舳亂中流。無所施檣櫂。十夫挽而行。人聲水聲鬧。忽焉登平流。舉舟相慰勞。神祠牲醴酬。榜人金布犒。賓客互評論。童僕雜呼嘯。或言此危機。死生呼吸召。或言此竒觀。壯遊觀竒妙。喜者果非情。恐怖亦可笑。我生命在天。安危任所到。

牛路河

此山陡然下。彼山陡然上。相望不盈咫。一落乃千丈。溪廣不容刀。一舟十夫盪。舉頭望青天。勢如坐井仰。我聞大小華。擘自巨靈掌。又聞懸度國行者。束馬往媯皇。奠鰲極怪竒。不勝賞經生。老牖下目。

論何由像

寄和暢甫

道在天地間。頻遭學者蠹。始緣標榜心。漸入膏肓。痼辨異相短長。黨同互回護。傾蓋當貢諛。少緩便逢怒。俗士交如醴。柔茹剛則吐。好龍既非真。畫席終成誤。吹毛索垢。痲望鱗。競攀附。假茲翰墨緣。飾彼羔雁具。本思驥尾託。忽變蛾眉妬。區區不才心。當此實恐懼。孤陋非我憂。獨學守其故。安知紱佩華。弗忘澗槃寤。仰思古賢豪。遙遙不可遇。與君三歲別。道長阻良晤。離索古所歎。聰明日蔽銅。新篇

惠然來十讀。長生趣如逢。先路導弗禁。後塵步名山。得其人。此外又何務。洋洋盈萬言。字字如鐵鑄。藝苑一燈傳。學海百川赴。我行湖湘間。素餐閱晨暮。支離經生談。淫麗詞人賦。苦無玉尺量。况乃金鍼度。安得大雅材。豁然掃雲霧。方今著述家。僕指不知數。夜郎各自尊。雄辨無慙怖。椎輪尚無方。動曰顯慶輅。談藝薄曹劉。述史傲遷固。紛拏金石牋。瑣碎蟲魚注。誰將苦海航。引之登覺路。

經陳太邱故里

官府政多闕。庶人私議生。嗟彼桓靈朝。皇綱日以

傾奄人起鈞黨處士爭虛名汝南畿輔地乃有月  
旦評區區太邱長風采動公卿談笑杯酒間德星  
為之明蜩蟬果厲階標榜亦亂萌君子辨名實聲  
聞恥過情

竹堂類稿卷二

五言古詩二

送同年李石農觀察浙東

昔年升士籍與君兩頡頏相見意氣投因而肝胆  
向稽古共冥搜論今互遐訪推賢我獨深友諒君  
何讓君今承

帝簡繡衣巡海上抱才方有用守道必無謗永嘉  
山水窟雲物最清曠風俗亦樸淳祿入裕潔養飲  
水盡親歡焚香答  
天既優游布爾政自副蒼生望

國家承平久八瀛如莊衢近聞草竊輩嘯聚海東  
隅黨羽累就戮渠魁尚逋誅坐令守土吏束手相  
嘻吁徒憂亦何益所貴求根株我思絕島外古係  
無人區生厓在螺蛤居處依崔苻安能久生聚三  
舖充無虞此必有奸宄齎梁給其需今惟嚴船禁  
粒米不使踰終當鳥獸散殲滅等朽枯  
庭堅古刑官素著執法名執法豈云難貴得法外  
情蚩蚩我赤子艱辛度晦明一朝陷縲紲哀鳴求  
其生近世吏折獄半由文致成鈎距以為巧民命  
鴻毛輕世若有此輩君當力支撐與其殺不辜寧

我今以下另起

失於不經徃詰有明訓百世不可更我年未四十  
遽抱奉倩悲嗟君亦同病中歲虛其帷上有白髮  
親下有黃口兒貧官艱并白隻身強支持無何兒  
復殤興言輒連洒丈夫貴闊達勿屋兒女思中饋  
聞無主何以成孝慈勸君覓麟膠及時續朱絲

奉題 儀世子松下讀書圖集文選

載筆陪旌祭 謝朓 三入承明廬 應璩 唯然覩世哲  
顏延年志尚好詩書 阮籍巖穴無結構 左思仰觀  
嘉木敷何敬祖長嘯入青雲 曹植思賢詠白駒 曹  
攄爽籟警幽律 殷仲文振風薄綺疏 陸機 豈徒暫

選

清曠邱遲是謂仁智居應璩

南川盛尹負米圖

祿養本為親仕者每遠游吁嗟望雲心常懷萬里  
憂我行典巴郡南川有賢侯侯方奉諱歸百姓板  
轅留板留父老情遺愛古如此孝子戴星歸固無  
可留理至郡將告行蕭蕭少行李袖出負米圖欲  
語淚不止感君菽水思增我風木悲我親棄我早  
我祿親弗知行役徧九州懷歸未有期何時遂初  
衣誓墓吳山垂

温湯峽

温泉世所希此郡乃有二一在巴江湄一在璧山  
治地豈有丹砂泉出乃如沸乃知揚左賦諸竒實  
未脩目之思舊遊地殊事亦異我昔遊歷陽曾著  
香泉記緬想昭明迹流連三致意昨歲過驪山信  
宿華清地親試蓮花湯吁嗟天寶事今茲典斯郡  
非無探竒志誠恐供帳煩重為父老累空聞温湯  
名弗敢駐騶騎何時乞間身遍訪蜀山秘斯泉恣  
泳遊掬斟隨我器

漫成

夜戰多金鼓晝戰多旌旗孫吳著成法將為兵家

師後人習野戰遇寇惟窮追技擊與節制一切無所施退亦不聞金進亦不聞鼓雲集而兩散士卒自為主敗則譏諸天勝亦夸予武如此英彭流噲所不屑伍

題傅青主水墨花卉畫冊

百卉生含英朱紫各異色孰為繪畫是斯理不可極達人多慧心緣物以為則心慮五色迷一切守其黑所尚在元同豈徒去雕飾春風天上来草木蕃以息當其未萌芽皆藏太元域智者叅物理寄情水與墨渲染忽成形賢愚共能識靜叅造物理

選

生機滿胸臆一一性海來詎假丹青力

兵書峽

風后創握奇軒皇平六寓維時兵寓農徵車按籍數八家居同井八陣出同伍但有守望勤而無征調苦戰國井田廢其法稍變古孫子十三篇實為兵家祖其餘韜與畧智巧各覩護郢書而燕說雖多亦奚補偉哉趙武靈戎服夸予武變車以為騎擊刺如風雨厥後兵家流習此以禦侮八門武侯圖五花藥師譜或員而中規或方而成矩非無少異同孰敢相奴主可知古兵法一廢不再舉不見

房太尉誤讀車攻詁義軍四萬人盡化陳陶土大江東南流諸峽如蠶叢相傳兵書峽秘笈藏其中裨乘喜附會地志多雷同嗟彼耳食流何以開其蒙自古知兵人豈由故紙攻運用在一心神竒出無窮岳侯好野戰所向亦成功趙括讀父書臨事終昏曹况乃索隱怪天豈誘其衷試觀黃石畧平易六經同

選

乙丑元旦

人生百歲期今朝我過半盛顏既蹉跎桑榆日已旸昔我始生辰丙子秋穀旦山鷄集庭隅羽毛五

色燦僉曰文明祥餘慶占爻彖六年就外塾幼學解書筭十八衿始青藻芹思樂泮衣冠習揖讓墳索恣點竄頎頎漸成人既婚亦既冠稽古鑽故紙勵志寄柔翰思賢詠伐木學道未登岸徒抱覆蕒心輒興望洋歎孤竹空自鳴芳桐屢經爨三薰韓愈賒一刺彌衡漫遭遇

聖主恩選士求楨榦弗以散木棄且作祥金鍛射策登龍頭談經入虎觀執簡直曹筵載筆侍香案終非天廟器遽被塵鞅絆三接辭日邊一麾吟澤畔粗官走牛馬俗士類冰炭軍符磨盾急民俗懷

輒悍瘡痍憂拊循。荏苒責守捍百事。慮叢腥夙夜。  
我心憚忽然逢伯樂。傾蓋刮目看屢陳。山公續特  
設。穆生晏飛書。馬上傳借箸。幄中贊頻稱。長卿才  
弗較。仲氏嘖坐是。徇所知。星霜今六換。倦鳥戀山  
樊。勞人思里閉。榮枯雖在天。行藏貴自斷。良庖善  
藏刀。大匠恥畫墁。

峽中作

偏仄復偏仄。兩崖如積鐵。孤舟入其中。與波相曲  
折。百夫同呼耶。十盪亦十決。篙聲向水爭。帆力藉  
風掣。遐想鴻濛初。川融山則結。不知何王代。此地

忽迸裂。豈真如后朝。特勅巨靈截。其上浮雲連。其  
下洪流泄。晴霄走迅雷。暑路洒密雪。我行徧九州。  
於此歎竒絕。溟津造物初。其理不可說。舉頭望青  
天。蒼蒼一綫揭。

出峽

積雨滿雲巒。孤舟出江渚。兩崖不見人。但聞烟中  
語。野老朝趨墟。塗遇相爾汝。始知出峽來。路已入  
荆楚。

元夜舟中獨酌成詩

開歲纔一瞬。明月忽已圓。我行赴京國。晚泊荆湖



邊青天無纖雲舉酒對嬋娟江村八九家茅茨比  
屋聯兒童戲竹馬笑語聲喧闐嗟我辭京闕宦遊  
今七年初客苦寥落積久亦自然荒江夜蕭條頗  
得清景延雖無管絃樂尚勝戎馬填村醪不成醉  
聊以娛目前

感遇

魚游常逆水鳥飛常逆風魚鳥亦何知化機運其  
中人生寄宇宙譬彼蟲能蟲有順欲無逆所見殊  
愚蒙秋林感黃落春至還葱蘢榮枯會有時循環  
無始終草木初不言委心任洪濛

選

夜宿呂堰驛追訪王聽夫事因述以詩

聽夫名翼孫吾友鐵夫之仲弟也少以書  
生入昭信伯李公奉堯幕府為書記既而  
供事宗人府議叙得從九品官之湖北乾  
隆乙卯歲白蓮教奸人將作亂聽夫權長  
樂丞長樂之賊蠢蠢欲動矣聽夫庶知之  
密白上官并條陳勦捕事宜維時天下無  
事文恬武嬉聽夫啓事至大府共怪其言  
不祥以他員替之未幾長樂枝山來鳳之  
賊相繼起而襄陽老教賊人則以嘉慶丙

辰三月十六日起於黃龍岫是時聽夫復  
為呂堰巡檢呂堰距黃龍岫僅百里聽夫  
得其耗集父老為守禦計百姓習承平日  
未覩兵革事聞聽夫言或從或否二十六  
日賊入境居民奔散聽夫猶率其吏卒以  
捕賊已而賊大至呂堰之北有大石橋聽  
夫率眾踞橋而守俘斬數十賊賊至益眾  
即從聽夫吏卒亦漸漸引去禁之不能止  
矣聽夫自度力盡不可枝梧遂自剄尸墮  
橋下此嘉慶元年三月二十九日事也賊

退百姓尋其尸橋下死者眾骸骨縱橫相  
雜不可辨僅得聽夫死時衣付其家招魂  
歸葬而已迨永將軍保名永督師兩湖以其

事聞諸

朝邱如典而聽夫之死所傳

聞有異詞或曰為賊礮擊死或曰為賊所  
得不屈被戕云余向在威勤公之幕凡獲  
賊皆得鞠之黃龍岫之賊張忝倫為首也  
壬戌春總兵田朝貴既殲張忝倫生獲其  
姪送大營余鞠之則無戕害王巡檢事又  
言賊甫起時未有火礮也茲事往來胸中

不能釋項因計吏入都道經呂堰宿逆旅  
主人卞姓家其人知聽夫死事顛末述之  
甚詳因紀一詩書寄鐵夫載諸王氏家乘  
可也

鐵夫吾畏友令弟亦人豪少年負奇氣結髮稱俊  
髦讀書兼讀律餘力習戎韜始為昭信客倚馬工  
揮毫周攬九邊勝匹馬時驤超一朝作卑官頽首  
入吏曹是時秦楚間芽蘖生塘蠲君權長樂尉狐  
鼠伏在郊蝟蠕勢將動議捕計則撓移官之呂堰  
倏聞賊矢嗚父老驚走告閭井塵甚囂四方承平

久百姓樂怠教武夫諱言兵將情士卒驕軍符累  
徵調臨事虛翔翺君乃義形色召集里中豪部勒  
寓兵法戰守分勁茅衆心稍踴躍冒死相招邀初  
出有誅斬報功絕濫叨俄而賊大至萬戟若蝟毛  
心知力不敵盡命甘茹刀尸僵卧橋下碧血淹征  
袍駱酋亦狼籍日久隨波濤竟無尸裹草行路悲  
號眺父老陳其事所司告於

朝祭葬賞延世

天語親矜褒嗟哉一巡檢於  
國如鴻毛居然死勤事官豈論卑高魂兮定為厲

殺賊隨征旄今聞凱歌歸安用巫咸招哲昆世誼  
士與我素久要十年鴟原痛志在幽光昭疇昔思  
作誅衆說然疑交今我履其地與人論非訛作歌  
表餘烈所貴揚貞勞他時補志乘非止陳風謠

題法時帆先生玉延秋館圖

我聞古仙人呼龍種瑤草鍊氣服玉英顏色常美  
好又聞青城山蹲鴟世所寶山人餌為糧終歲坐  
安飽詩龕有詩人嗜好酸醎表食古味道腴清氣  
滿懷抱新起玉延館雲山四圍繞分畦別縱橫埋  
根任顛倒修蔓綠雲紆繁花白雪皜種方邵侯瓜

獲等鄰人稻堅白截肪同方正割肉巧蒸雲竈守  
嵇和羹鼎取部甘需蔗霜調辛謝壘臼搗入藥延  
顏齡題糕補韻藻釋名神農闕擇術齊民討匏菴  
吾鄉賢與公有同好築亭繪作圖好事石田老佳  
話在藝林長老尚能道孔食思瓠瓜曾嗜傳羊棗  
哲人適其性不學凡俗矯芋分瓚師香飯笑劉公  
晶飲啄應隨緣豈容世情擾萬羊官廚多半菽園  
叟少豐儉各有時達人任所造寫生索迂倪吟詩  
逼瘦島試補食品書攬者備稽考

題陳蓮夫進士傲王石谷山水為楊補帆作

石谷畫山水

本朝第一手楊子今畫師心契蓋已久此畫出陳  
生規撫十得九烟嵐萬千疊頗自誇腴厚豈以千  
金賞自享貧家帚弄斧公輸門匠心定不苟我不  
識陳生楊則神交久我與沈三白六法有所受後  
生張伯雅暱我呼小友兩人迷楊子贈炙不去口  
芳聲耳焉熟識面緣未偶今來鳳山住忽有款門  
叟手持一軸畫精神甚抖擻口致主人詞索我標  
其首畫叅南北宗變化非墨守邱壑惟心造烟雲  
供驅走張我虛堂中如人入林藪宜乎賞心人寶

選

藏若瓊玖放言述顛末蕪語愧壑白

支硎山吾與菴圖卷為寒石上人題

勝跡不在遠所貴凡塵隔城西不廿里窈然靈境  
闢莊嚴古道場疇昔支公宅其旁有苑菴林麓更  
幽僻上人今繁可于焉託晨夕空潭魚自行嘉樹  
鳥非擇人生宇宙間去來元如客心賞即此佳緣  
盡還他適要知三生因寒山問片石

和韓昌黎城南詩題陸耳山先生遺草

耳山先生和昌黎符城南讀書詩以示令  
子秀農洎先生歿後秀農繪和韓遺訓圖

徵詩因賦此

文章載道器名亦德之與韓公斗山客所業在儒  
書讀書究三古抗志立四虛道闡二儀外學衍九  
疇初博麗宏兩京哀怨追三閭俯覽當世士一切  
皆蔑如纂言烏成馬隸事獺祭魚振竒入荒誕愛  
博嗤空疎文苑若聚訟適供人軒渠自矜冀北馬  
終作遼東豬無成等項籍虛生類曾蜎笑鵬齊二  
鳥附蠅集三蛆古今一邱貉相士當以居緬惟明  
德後達者其誰歟雲間陸士衡胸次萬卷儲機軸  
由已出寧屑撫唾餘游心姚姒代賈勇弗次且學

術戒歧趨非種必與鋤陳言掃芻狗高躅鳴金驢  
手和城南篇經訓闢新畬古賢惜分陰常恐歲月  
除自樹士林臬豈曳王門裾有子習庭誥蘭芽播  
令譽書倉積高廩學海宗歸墟杜陵美驥子陶令  
責阿舒哲人謀燕翼善誨實愛諸道岸登必先勿  
使中路蹠

題王藝芸遺像

萬竹綠如海中有幽人居幽人樂寂靜門無俗士  
車爐香與盃茗清供林中儲石牀眠素琴抗懷思  
黃虞昭文雖不鼓山水趣有餘世無山嵇流誰歟

同居諸

戊辰述夢

嘉慶歲丁卯我尋遂初賦心愛西湖佳卜宅杭州  
住有客邀觀潮扁舟海寧去海風寒中人歸即呻  
吟卧迷離夢境生四山翠屏樹中有古招提宮觀  
莊嚴具我現僧伽身躑躅循崖步少年一沙彌執  
燈導先路舉手向我言此地公應駐彼岸東南隅  
林壑多幽趣當有宰堵波佛語親屬付候公住此  
山功德方完固我時心思維此舉非細務四海大  
檀越與我多親故此緣尚易成此果應無悞心與

口相商嚙語自宣布家人各驚呼吾亦豁然寤異  
哉此夢境幻相非吾素事豈在後塵抑或在前度  
問天天不言百年如旦暮

題汪氏六息齋印稿

書契代結繩勒銘遍鼎鐘防偽作符璽法沿斗檢  
封羸劉擘刻印紫泥錯丹彤厥後嗜古家摹畫追  
前蹤奇字象蟲鳥古制蟠夔龍腕力露巧拙心畫  
呈纖穠塗酥白玉琢撥蠟黃金鎔異文汗簡討利  
用昆刀劃窪窪辨款識行列分橫縱夢英十八體  
繆篆世所宗嘗讀印人志妙手嗟難逢汪子工鐵

筆識字師冰筮書成簪花格斤運刻楮鋒圓轉珠  
在握光恠星羅胸灼灼春林花鬱鬱秋澗松上者  
卿相佩次亦文房供琳琅積成帙璨若羣玉峰著  
書寄商榷不遺菲與葑我少習鄙事愛古忘愚蠢  
窮年琢山骨臚列同璜琮不辭嘲石癖稍異供書  
傭撫此觸素好恍聞谷音楚珍如金萬鎰髣以錦  
十重豈云雕蟲技壯夫所不容

選  
更生居士挽辭

丈夫不虛生各尋不朽事其事非一端要有孤行  
意昔聞洛陽生孝文世方治忽陳痛哭詞讀者心

欲悖吾友更生翁平生好岸異官為柱下史封章  
無路致手草萬言書高論罔識忌投諸執政門藉  
達登聞使上言補衮職下言慎名器臚列衆公卿  
一一寓風刺剖心志無他批鱗視如戲

聖明日方中處士敢橫議緹騎晨在門草索繫諸  
吏

國家有常刑臯陶法當寘欲殺非

堯心玉門姑投畀萬里執爨行十旬

賜環至狂言

聖人擇且作良規記誹謗既無誅芻蕘况弗棄臣



心天已鑒露雷教同被憶昔及第年金門出連轡  
策名愧盧前論交幸王次百家方爭鳴公獨樹一  
幟家藏多秘書客到問竒字每矜意氣豪頗受聲  
名累著書長卿才歸田平子志仁粟分鄉鄰智囊  
表童穉知公篤於親臨樂輒奔避知公友于弟解  
組敦風誼公今歸道山斯人不可二既為逝者傷  
撫躬亦墮淚芝焚蕙自悲物性傷其類

題嬾愚和尚面壁圖

達摩住嵩高壁觀九寒暑觀壁亦何為舉世無可  
語我不著言說不如且默處上人天親流寶林傳

慧炬八識辨覺知四禪徵能所偶作面壁圖獨坐  
了無侶澄心以觀空萬象一心貯觀空空亦空六  
合曠無阻人壁兩相忘形忘跡不著諸法皆歸空  
大化不我圍况此瓦甍等道果在何許非壁而云  
壁斯義吾能舉無相有相同諸相總土苴已得達  
摩髓心印佛傳汝若遇僧神光且與安心去

靈隱話兩圖為顧星橋作

步出鳳山門衆峯揖我前二三素心侶相約同逃  
禪初叅慧理塔乃登妙喜筵洗心八德水合掌九  
品蓮白雲鐘方撞綠雪茶已煎是時當盛夏晝日

長如年讀書逢快雨彈琴和鳴泉或觀貝葉經或  
讀山居篇樂哉山中靜主客皆流連偶與一夕話  
亦係三生緣有圖復有詠共託名山傳而我轉一  
語天地風輪旋四大偶和合成此法界圓空華條  
生滅萬物無完堅擊電機易失觀河境屢遷世間  
有為法執著滋蟬鳩譬彼春蠶絲何苦多牽纏吾  
生幾須臾飄若火上烟掃除一切淨覺海真無邊

臘月十九日東坡生辰項秋子招集同人祀

於西湖蘇公祠賦詩紀事

靈均作離騷庚寅述初度生辰直南斗昌黎鴻辭

布昔賢念始生鄭重見章句平生一片心百世尚  
可沂偉哉蘇長公英才天所付神峯五岳尊學海  
百川赴大聲金石鳴小物蟲魚註慧業四禪天博  
聞九經庫公年三十七通守杭州任官閑簿領稀  
嘯傲謝塵務止留風月談鬯領湖山趣爐箠歲三  
改移官高密駐轉燭十三春仕途屢顛仆登朝掌  
兩制謹言觸當路再出守是邦經綸仍布護班春  
巡四野父老喜重晤是時元祐初執政國之蠹直  
道身不容蛾眉自遭妬而公仗節來吾自行吾素  
勸課先農桑拊循徧婦孺論狀及西湖經營濬潢

汙艱難小民依仰向君門  
訴六橋卧宛虹萬井甦  
涸鮒善政決人心千載如旦暮  
即今孤山根叢祠鄰白傅  
牲醴歲時陳薪木鬼神護  
季冬月既望風日甚和煦  
適值公生朝登堂辦香炷  
迎神復送神飲福亦受昨  
項斯風雅士即事詩先賦  
善歌多繼聲壽陵共追步  
維公初生時仁皇方在御  
景祐歲丙子誕降謝庭樹  
讀書窮萬卷健筆妙陶鑄  
帝曰宰相材始進天已顧  
何圖生不辰羣小輒乘忤  
煌煌經國計十事九逢怒  
生既投窮鄉死又黨人錮  
彼蒼豈忌才斯人乃不遇  
倘因始生辰命宮磨蝎

故予生亦丙子宇宙微形  
寓當世尠樹立撫躬多  
憂懼稽古頗自傷懷賢特  
傾慕聊假文字緣少寫  
烟霞痼

題師竹道人載鶴圖

昔為山澤游槩舟五湖濱  
穹窿一山矗萬仞青嶙峋  
乘興坐筍將遐訪山中  
人幽踪託泉石高掌捫  
星辰宿宿復信信相與忘  
形神名山不可留一別  
今三春披圖忽相見  
馨歎若再親扁舟小於  
葉擊檝生連淪雙鶴作  
伴侶四山如比鄰松聲  
滿阮谷如聞天籟新  
何必學禦寇御風動  
經旬何必學佐

卿驂鸞朝玉京。但當謝世緣。掃却心地塵。寄形天地間。淡泊養其真。委心齊物我。便是無懷民。

夜游白雲泉圖為觀性上人作

客秋山澤游。策杖天平麓。天平多竒石。萬笏雲中矗。一徑兩崖間。危磴古苔綠。百步達山巔。豁然開心目。乳泉生石罅。清響雜琴筑。山僧結菴宇。置懸崖屋。手酌白雲泉。飲我滌塵腹。是時秋正中。叢桂方吐馥。恍坐祇樹林。繞室飄金粟。茲游倏經年。光陰若轉燭。忽然披此圖。舊境復振觸。卷中列三人。兩未接芳躅。嬾師曾識面。瀟灑拔塵俗。舉一知

三隅高蹤應可矚。荒言鴻無範。信手已滿幅。

金梅尹畫像

少游童子科。橐筆逐儕偶。君抱軼羣才。衰然獨舉首。彈指四十年。風塵各奔走。即今歸家巷。皤皤成兩叟。少年同學人。十已亡八九。誰與寫君真。獨坐曠無耦。邈若有所思。一卷書在手。此豈萬言書。匡時志不朽。抑探五經庫。彞訓謹墨守。他心予忖度。含意可代剖。新著潛夫論。寄興在林藪。問君然不然。君乃莞爾受。閒居有拙政。孝乎惟孝友。

題吳枚菴畫像

我年十有八始游青衿隊誦法魯叟書束髮從先  
輩維時搃觚家相尚事藻績萬口同一聲粃糠不  
可耐延陵有君子儵然塵埃內精心力稽古當世  
曠無對書宗文董儔詩別金元代餘技戲水墨亦  
與倪黃賽篆刻名一家古趣出鼎鼐事事可我師  
傾心奉清誨壯游歷湖湘扁舟書畫載抗禮公卿  
間耿介表風采我方典文學欣逢素心在歲時接  
居遊坐閱春秋再一別十七年湖洄苦靡速忽聞  
簷鵲鳴楚然足音賚於我十年長絕少龍鍾態將  
母在高堂常盡慈烏愛當今天爵榮如公應無配

茲因贊公像長言述梗概

六月寒

昨夜雨滂沱簷溜聲如瀑晨興御絺衣四體意瑟  
縮涼風東北來發發振葑屋天氣冷如秋當暑人  
思煥敝袍欲裝棉雞犬爨下宿我聞山東人饑饉  
苦相續男女論斤賣藜藿不果腹于今已三年行  
者聞野哭何以極斯民歲豐五穀熟似此六月寒  
逢年未可卜彼蒼心仁愛斯民禍何酷安得鄒生  
律吹氣回黍谷舉眼視蒼蒼心憂如轉轂

蒼聖祠

芑符啟元化一畫成義文佞盧與蒼頡兩聖生同  
胞彼作梵王笑千佛妙義包頡乃造六書點畫形  
聲交中國有文字斯實開前茅吾鄉多秀民尊經  
習弦匏崇祀以報本卜築城西郊巖巖鐵花岩窈  
窕山之坳喬木森鬱律廣厦臨呀摩葩華麗藻井  
翠蕤曳雲旒靈光耀四目恍惚神未教羸氏燔六  
經淫威恣魚然兩京采遺籍萬手迭傳抄魯魚與  
帝虎安得免溷清所貴識字人特出警愾收形如  
范金鑄聲若吹管嗚務令衣珠授勿類瑟柱膠仁  
義當安宅禮樂充繁毅神功被萬葉不讓燧與巢

揚州遇沈星槎秀才賦贈

昔我識君時君年方十六我叨一歲長里巷相徵  
逐常披董生帷屢看元卿竹鑿壁一鐙明臨池千  
管禿君紉空谷蘭我采中原菽一別四十年光陰  
如轉轂今朝在蕪城兩葉浮萍觸執手各听然髮  
容已非倣昔為不羈馬超騰千里足今作社中櫟  
擁腫而卷曲幡然兩禿翁蟬聯歷信宿主人若鄭  
莊愛客傾醕醪開筵集紅妝彈箏復擊筑折俎薦  
雞豚雕盤襍穀菽陳娥與毛女身披五銖服當筵  
角明瓊纖纖手如玉酒至發清謳明珠聲絕續懽

樂興未央卜晝繼以燭我醉發狂言聽者耳而目  
世事如浮雲呼吸現榮辱白衣化蒼狗六合無定  
躅不見東方生手草三千牘漢皇作弄臣寶劍空  
割肉又如揚子雲清靜習符籙事急不聊生奮身  
別天祿高軒羨鶴乘衡木苦牛牯忿忿白髮生忽  
忽黃梁熟行藏當自斷安用問龜卜君復向我言  
近頗厭塵俗飯心空王法少欲因知足宴坐常觀  
心飽食自捫腹世間六種塵無一非醜毒善哉夫  
君言至理異蒙瀆歧路已亡羊安問滅與毅飛鴻  
雲中翔狡兔草間伏一步觸危機百方不能贖萬

事不如歸故山清且淑與君卜鄰住常守松與菊

秋日游西山和黃堯圃韻八首

行跡徧天下言旋歸故山獨學寡儔侶寂寥常閉  
關祇林有開士近在咫尺間幽人邀我去林麓同  
躋攀松下叩荆扉相見禮數刪問以無生法導引  
心不慳階前十竿竹新筍已成斑乘除悟物理所  
貴在心閒

山僧愛禪寂閉門無客至與我獨有緣經時必馳  
思文殊與維摩論法原不二每聞空谷音輒復迎  
門遲扶老倚瘦藤嘗新薦芳芰說法無異趣論詩

有同嗜坐待東山月夜深不肯睡萬籟皆寂然遙  
鐘起鄰寺

黃子清興發奮筆導我前新詩若韋孟澹泊追前  
賢即事啟妙旨當筵聳吟肩因茲一夕話結此三  
生緣憶昔昌黎翁蹤跡比大顛亦有陶士行手酌  
菩薩泉儒墨同一本何處分媿妍且結方外交脫  
略消殘年

穹窿西山勝一歲兩至此山泉滌塵襟松風清俗  
耳仙佛無兩端至道本如是白雲入疎櫺青峰映  
槩几鄰侯亦山人樂大即天士誰與注真文我思

浮邱子掃淨秋空雲不留太清潭山中鐵竹僊有  
客懷芳趾

世界大如此中有傀儡棚嗟彼一孔儒昭昭侈小  
明漢世朱翁子操術工逢迎一朝典鄉郡錦衣當  
畫行至今讀書處水木含餘清譬諸古瑞室作頌  
煩鍾磬好事都元敬鑿石手題名硯田可逢年稽  
古勝力耕

野人舉首將才于下山麓路過拈花寺廟貌甚清  
肅近有樂餘翁伴來獻圖卜山門久荒頽溪水空  
滄鷺偶發菩提心勢易如破竹化城輪奐新靜室



梅檀馥福田種善緣君子貽有穀僧廚粥飯香門  
外有眠犢

心似已灰木身如不繫舟善哉坡公語毘盧頂上  
頭山溪有蘋藻可為王公差書倉擁萬卷不讓百  
城侯眼中吾老矣時作汗漫游徜徉山水間聊以  
忘我憂不為朱紫客俯仰得自由何以娛晚歲一  
壑與一邱

停雲藹空中令我思親友披卷讀君詩紛綸積八  
首有如大小珠歷落盤中走我欲步後塵輸攻墨  
能守雲龍好追逐駸駸互先後雲霞與日新松柏

得天厚同聽上方磬共傾中山酒終期德有隣豈  
謂物無耦

初春至鳳巢訪會一上人雪中呵凍錄成二

十四韻

此山名鳳巢何年曾巢鳳羣峰迴鬱蟠一徑直鴻  
網道人避塵囂維幽叟鑿空小築精伽藍木石自  
斲龔移樹嶽神臨散花天女爰平臺若建瓴幽壑  
如入甕荒庭水平堦虛閣雪停棟斷澗鳴冰漸長  
林隱煙霏我生愛幽討望雲輒空惚一意竟孤行  
三人亦成衆穿林尋梵唄策杖却騎哄入門妙香

聞開窗空翠貢綠牆艾蒟乾綴簷冰著凍石泉助  
茗戰松風和琴弄道人古神秀逸材脫羈鞅頻緇  
貝葉文永絕藕絲痛四分律自持萬轉經常諷習  
靜觀久空叅禪機亦中心遠百魔除道高四流控  
山疑鷲嶺飛僧學虎溪送蒼涼文殊臺莊嚴善財  
洞高峯堯峯間有此可伯仲青天留鴻跡丹穴求  
獅潼聊偷半日閒且結三生夢

門有車馬客行送張古餘太守入都

仲春風日好桃李滿園開當關報有客五馬從西  
來客本金閨彥胸藏濟世才十年典大郡報政尚

書臺班荆欣道故春江綠如醅共尋金蘭契弗假  
羔鴈媒歡笑不終日鳴騶當路催憶昔初相見傾  
蓋蕪城隈維時淮南北濟水方為灾窮黎失衽席  
膏壤成汙萊都君善輯寧噢咻如嬰孩懸鏡獄不  
留吞舟網亦恢即今遺愛在一路甘棠培  
皇朝方求賢經綸筮雲雷寶玉不韞匱龍驥皆呈  
材夫君入承明應有交章推天衢近若咫尺行矣莫  
徘徊

食車螯作

蛤蜊種非一種種觀我頤車螯亦其類地僻世罕

知珍異抗海錯滋生在江涓內無知覺運外有文  
采施每隨潮上下亦與月盈虧賦形殊混沌辨種  
靡雄雌非符常守口無竅安施眉聊勝坐井蛙妄  
擬測海蠡嘗新美無度飽食秋為期自矜藏身固  
誰料棄甲危今年蕪城住有客頻見貽不憑門生  
議直付焯人治傾筐市非遠挂席拾罔遺徵名蟹  
胥類肖形姹女私捉同跛足鼈蛻似剗腸龜烹專  
屬爨婢捕不需罟師鏗鏗羹轆釜滴滴膏流匙初  
疑乳成酥旋覺膚凝脂江瑤乃族類海蜃匪等夷  
質應由雀化力不勝鷓持寧方瓦楞賤稍遜珠胎

奇祛冷紫薑末受辛青蒜絲滑膩雜湯餅芳鮮佐  
酒危鄙人忻果腹演此車螯辭

春日訪澄公用東坡贈參寥師詩韻

開歲雨雪多二月風猶冷山中春信遲百卉未抽  
穎今朝忽晴霽初日觚棱炳當闕雙魚未巡簷一  
鵲警幽人邀入山暫把塵事屏蘭舟御風行捷比  
花驄騁探梅鄧尉坳地灑入銅井雖無濟勝材精  
進即勇猛回舟向支硎遙望剡竿影空山無人聲  
澄公方止靜相見出新詩篇篇闢異境細哦猶未  
了皓月升東嶺何須叩鐵檻妙墨尋智永公有擊

電機願聞不敢請

登公題五嶼讀書圖

東方有卧龍讀書觀大略經生務精純其流乃穿  
鑿亦有綴學徒所志在好爵金閨籍既通束書置  
高閣松陵有嘉士素心愛墳索終歲手一編性情  
此中託監古求明鏡醫俗購良藥世間事萬端無  
如讀書樂况居山水間清虛接寥廓苦心志艱難  
至味寄淡泊我生束髮年心早慕述作欲傳無盡  
燈若探有底橐游蜂鑽故紙驚蛇赴大壑光陰惜  
寸分豈肯坐消鑠載歌伐木詩聞聲心先躍安得

酒一甌與子共商榷

登窺園閣呈淵如先生

升高能作賦古稱卿士才胡為江都相坐守故紙  
堆芳園五畝多結構青溪隈花竹交掩映猿鶴無  
疑猜主人日三至客亦載酒來平橋穩通步曲水  
安流杯綠憐野梅落紅想池蓮開高樓在西北旁  
有凌雲臺文窓洵窈窕明月常徘徊遙望清涼山  
山勢同崔巍與君結古歡契若陳與雷傾心出肺  
腑拊掌雜談諧達人獸圭組一官棄屣回移文謝  
北隴養志循南陔烟雲恣游戲邱壑通化裁清和

選



四時適曠。與二妙談琴書養生。主風月行樂。媒漸  
離人事。遠方識天道。恢凡今繁華子。不少斗筭材。  
僥倖一枝借。安知鴻鵠哉。

詠史

秦用商君法。逋客無遁藏。後世祖其意。保甲編成  
章。其人雖自傲。其法實則良。胡為博浪沙。金椎出  
道旁。萬乘千騎間。出入莫敢當。此非天網恢。毋乃  
失紀綱。大索十日窮。罪人終逃亡。寄語千金子。安  
坐毋垂堂。

孫武兵法祖繼者有武侯心書闡遺義字字先後

俾中原既板蕩。天險在益州。當其隆中卧。早定三  
分謀。劍閣塞關隴。夔門鎖江流。舉國習農戰。民勞  
亦小休。若言獎王室。山川阻且修。水陸不並進。神  
州安可收。一師向宛洛。一師出岐周。首尾不相救。  
攻瑕勢方道。自從失荆襄。初願遂不酬。

孫淵如五畝園圖

興公厭塵網。言尋遂初賦。心愛鍾山佳。卜宅金陵  
佳。芳園五畝多。近接青溪步。當中構虛堂。制度甚  
完素。堂後布名花。堂前列嘉樹。幽沼屈曲通。清波  
自流注。中有妙蓮花。觀者生神悟。主人愛客來。共

領烟霞趣

古人勞王事將父每不違公獨篤於親潔養歸故鄉堂上垂白翁心泰身康強室有三婦艷佳兒亦扶牀花時集婦子介壽舉一觴綵衣共娛戲蘭桂儼成行安事人爵榮天爵樂未央

古今人不同所志必有託或愛貨與財或慕官與爵擾攘百年中一心苦纏縛公乃異於是所尚天倫樂阿翁八十餘精神甚矍鑠明歲鹿鳴時旨酒看重酌大椿多修齡常棣亦聯萼我知謝幼輿所性在邱壑

富貴易銷歇文章乃不朽聖賢垂六籍所仗經生守公性耽圖史勤學世無耦書宗孔氏傳潛研及科斗解字及說文一筆不肯苟鴻文自有範英絕脫窠臼著成等身書壽比名山久

吳曇繡挽詞

茫茫宇宙間大海真無邊萍兩葉逢亦是多生緣公生歲甲子我後十二年事公如事兄於禮亦宜然家世闔閭城與公生同里平生出處蹤約略頗相似百吏共彈冠人情重館閣公居鳳凰池瀑直聽金鑰我在玉堂中簪筆守鈴索皇天付玉尺

量才典文學桃李滿門前願之心亦樂忽然事戎  
馬世事偶邂逅公平南越王我掃西川寇姓名  
九重知論功賞亦懋冠彩孔翠翎衣表神羊繡及  
公作屏翰開府東海濱而我亦繼至為  
國執法臣芳林槿易瘁滄波蠖不伸安步躡於垓  
先後歸田吟詩書課後生伏臘隨鄉人方期雲龍  
逐同享太平春誰料天不弔公竟先歸真古云德  
不孤修士必有鄰芝焚蕙應歎長言當吟呻

竹堂類稿卷三

五言古詩三

習靜圖

世間羣動聚誰能脫其網胸中一顆珠淵然自明  
朗十習紛漸摩方寸失所養至人心有主情盡見  
純想良田去非種靈苗遂滋長穩坐在蒲團端居  
絕塵鞅不依蒲褐禪不受風輪盪一心無所住天  
地日蕭爽

寒石和尚圓寂於吾與菴詩以輓之

世界一微塵人生一浮漚聚散各隨緣時至不可

留大師天台集非與凡俗侔幼齡心慕道棄家作  
比丘聲聞生妙悟禪定習薰修六種波羅密苦行  
不少休機緣在吳下飛錫止蘇州維時彭居士尺  
木養志守林樾逢師渡江來邂逅機即投同歸法  
王法結成方外游天寧開法席德行速置郵化雨  
徧十方清風動四流素心樂岑寂卜築水雲頭近  
依支公躅兼愛林泉幽祖庭在理安歲久無人鳩  
緇素競奔走請師蚤綢繆師往樹法幢坐閱五春  
秋迷津資寶筏法鼓震玉枹功成身又退言歸舊  
林取我生識公晚鍼芥交相求論心印正覺道同

不待謀常尋花之路或汎雪夜舟信宿草堂下雄  
談闢謬諂會心及露柱索解因風甌伊古選佛場  
動輒興戈矛傳衣命如絲曾為能者憂惟師性樂  
易與衆百無尤心不愛榮貴避之若避仇兩主名  
山席逝比鷹脫鞴嗟彼士大夫鳴珂擁八駟貪位  
戀華聯羣蛾撲膏油似師能退藏當世亦罕儔今  
春微示疾勿藥時亦瘳自知形骸傲何苦強拘囚  
世外光音大塵中歲月道飄然登覺路法在茶與  
鶯

題宋味菘閉戶讀書圖



昔從乃祖遊謂汝和先生商略讀書趣仰闕聖賢心推  
及當世務文孫善讀書青箱守章句弱年不好弄  
却埽常閉戶漢有董仲舒學通天人故三年不窺  
園對策光王度古人去非遠後生好趨步揮豪散  
珠玉游心入竹素振奇集異聞索隱發妙悟專精  
在經術餘事及辭賦立盡程門雪養成謝庭樹學  
殖本無窮歡喜必堅固昂昂千里駒自有伯樂顧  
老馬忝識途安思導先路

張雲藻司馬作餐菊之讌即席分韻得落字  
方舟赴海昌遠踐觀潮約江流亦已枯山雨時復

作樣舟在東門蠟屐過南郭升堂揖主人開筵設  
肴酌盤餐薦魚生家醞傾桑落羹方玉糝調膾比  
銀絲斫采菊擷其英嘉蔬襍薇藿香齋咄嗟辦不  
復煩鼎鑊芬芳滿齒頰安用屠門嚼

楊貞女詩

忠孝事君父所恃一心堅婦人事所天其道當亦  
然匹夫不奪志况乃姬姜賢賢哉宛邱媛閼闕  
西傳妙齡稟至性婉孌及笄年相攸擇嘉耦繡幕  
紅絲牽太邱有令子才調真翩翩媒言既下達姓  
字苔華鑄六禮行未備二豎灾忽纏倉皇凶問至

舉室涕泗連女心誓相從匪石不可遷生時不識  
面但願死同阡父母遂女志伉儷幽明聯不辭露  
紛惡遽易香纓妍舉案事如生饋食同几筵嫁殤  
雖非禮有志當從權肅雍事尊璋子婦一身肩猶  
子撫為子冠昏禮弗愆有子復無孫再絕乃再延  
春秋及古稀歸受一生全易貴女子貞詩尊柏舟  
篇

皇家勵風俗采訪到市廛中輟有完人  
恩榮綸綍宣叢祠歆俎豆綽楔旌門前老大職惇  
史貞孝載筆先作歌傳列女幽光發華箋

為張少農題訪古圖

古人去我遠其迹在金石無奈金石文歲久多黹  
蝕我生束髮來頗抱好古癖博采先廟堂窮搜及  
巖穴譌辨石門碑闕補岐陽碣上可證史書下亦  
佐典籍之子有同嗜扁舟任所適山巔與水蒞蒐  
訪不餘力琳琅富舊藏縹緗表新獲曷弗出所儲  
相與共由繹

韓尚書攜示蔣香杜都門見懷詩依韻成篇

却寄

尚書將入都祖帳錯履烏手攜一紙書封題字可

識署名朶雲新鈐印盤螭赤故人蔣元卿貽我新  
詩格上言叙蘭臭下言述萍跡芳訊日邊來弗遺  
澗槃僻憶昔素心人三五互匡翊同遊匠石門累  
射蘭成榮方舟澄江行策蹠寒秣陵役是時皆少年  
交似元與白酒邊激昂多燈下笑言劇彈指四十  
年邈若幾塵隔吾曹住世間營枯天所職如公黼  
黻才應在羲軒側文章抗先民不假鞶帨飾風氣  
未三變聲華日五色終期鸞鶴振寧慮桑榆迫勿  
效鯁生顰中道乃自畫靈虬乘雲雨所貴能破壁  
大材多晚成爍火焰易熄嚴霜除衆莽松柏始秀

特龍頭屬老成衆裏推雄伯驥酬千里志鵬奮六  
月翮嗟予謝簪組丹鉛守几席朋舊無幾人盼望  
佳音急推袁雖有心說項苦無力徒聽悠悠論彌  
切惺惺惜荒言作報章遙附蜚鴻翼

偶成

昔我少壯歲好麗兼好書一片殷勤心日與兩者  
俱後房擁姝麗圖史前榮儲不知日月邁但覺樂  
有餘行年過六十齒危兩鬢踈橫陳味如蠟粉黛  
等土苴翺風作房老紫玉歸幽壑柳蠻開閣去帷  
薄常空虛營營故紙堆結習尚未除丹鉛日在手

英華自含咀。兩好留其一。此生將何如。不化花間  
蝶。終成老蠹魚。

長江萬里圖為穹窿道士李補樵作

昔我苦行役。足迹徧九州。仕宦入西蜀。遂作萬里  
遊。放舟金焦麓。直到錦江頭。江行任風信。違問置  
與郵。俛仰一葦間。十旬猶弗休。江山多奇勝。止憑  
詩卷收。平生昧六法。佳景不可留。道人作此卷。與  
我機殼投。此卷出想像。非曰耳目謀。却因丹青妙  
一一。臚清幽。嗟予今老矣。跬步苦阻修。雖抱游岳  
志。此生不可酬。譬諸華嚴畵。只向虛空求。掩圖三

太息寄情託長謳

送董琴涵編修入都

士。生。宇。宙。間。豈。能。無。友。生。故。交。既。零。落。來。者。難。其  
人。哲。哉。廣。川。彥。當。世。推。雋。英。讀。書。聚。百。家。考。信。在  
六。經。策。名。金。閨。下。令。譽。揚。大。廷。韞。匱。玉。非。計。出。山  
泉。亦。清。

皇家重黼黻。枚馬文章榮。而我別有謂。所願異俗  
情。卿雲在天上。焜耀等日星。何如作霖雨。沾溉及  
蒼生。願公經世業。發軔在茲行。

天風海濤圖為朱南臺司馬題

仕宦有如海利濟良亦難涉波仗忠信先哲有成  
言公抱舟楫才撫字心力殫司勳書上考輿頌垂  
不刊賤子本州民攀轅追古歡甘棠有餘蔭時復  
及澗槃方今分郡符書名  
御屏端乘風從此去萬里常平安

六 為錢梅溪題寫經樓圖卷

經為衆說郭宣聖集大成其傳及萬世大道因之  
明錢子習小學八分逼漢京寫經首魯論學庸送  
交并其餘孝經等一一勘校精書丹入樂石典貴  
如瑤瑛汎舟至吳下學者欣將迎黌宮商位置環

列充兩楹美哉不朽業蔡馬當抗衡橋門聚觀者  
盛事追熹平家在梅花溪岑樓高閑閱芳園蘆水  
木虛室白自生此中寫經者四海知其名藝林播  
嘉話是亦稽古榮

題吳小亭雪夜校書圖冊

昔在維揚城同校中秘書延陵有才子亮懷比璠  
璣讀書推半豹講德尊三魚執卷夜燃藜傳餐朝  
翦蔬是時歲將晏積雪滿儲胥勤效孫康讀幽若  
袁安居日月驚轉燭寒暑互乘除嘉會業已散古  
歡跡亦踈忽爾展斯冊感舊增唏噓施公杓齒髮

選

衰角巾反故閭吳錫祺洪梧諸耆老零落歸幽墟  
之子抱雋才少年多令譽六籍為笙簧典冊婉相  
如發揮天人策不讓董仲舒早持青箱業上達承  
明廬

題徐香巖歸田行樂圖

仕宦本如海收帆宜及早無奈慕祿人此義多未  
曉託跡朱門下抗志青雲表一朝時不利冰山頽  
然倒所以古哲人知幾以自保先生少讀書經濟  
充懷抱一行作吏去所至百事了巖邑戴星煩薄  
俗懷磚校優優布其政譽滿長安道忽然解組歸

豈曰求安飽榮華無盡期不貪乃為寶桑麻同井  
歡竹帛傳家好膝下有佳兒文史恣蒐討琴書可  
消憂杖履自娛老道遙林壑間弗使俗情擾

道光壬午重過吾與菴訪心誠上人和三松

老人題山閣看雲圖詩韻

哲人既云逝山阿苦寥寂欲問微妙法茫然無所  
適偶經支硎山重訪林公宅彈指悟去來拊心感  
今昔鴻飛入杳冥雪泥尚留跡迦葉解拈花達摩  
曾面壁

送陸壻入蜀

人生宇宙間靈為萬物最。不讀萬卷書安得聖賢。  
會不行萬里路。安知乾坤大。迢迢劍南道。遠在青  
天外。危峰高嵯峨。大川急滂沛。昔我在此中。專城  
擁旌旆。維時白蓮賊。弄兵為民害。羽書急星火。籌  
筆冒塵壘。十年乃埽除。閭閻復清泰。陸生抱雋才  
聲名滿吳會。三十登賢書。功名未有艾。茲行真壯  
遊。手膏征車軌。江流七千里。視若一衣帶。老人憶  
舊遊。百事盡蒙昧。試尋武鄉祠。杯酒為我酌。若欲  
問行藏。靈籤勝著蔡。出師表兩篇。寄我賽珠貝。余  
武侯出師二表。聶蓉峰學使勒石成  
都武侯祠中。余尚未見。榻本故及之。

四月初八日與彭雅泉尤春樊黃復翁有入  
山訪僧之約。至期雨甚。不果行。遂小集花  
間草堂。以賞雨茅屋四字分韻。得屋字成  
五言十二韻

梅子始黃時。陰晴最難卜。初唐佛誕辰。同訪僧伽  
族。崇朝雨滂沱。行者心畏縮。言停水上舟。爰集花  
間屋。荒庭水平階。幽院風鳴竹。簷花墜殘紅。池藻  
延新綠。主人固倉卒。客至皆不速。湖蕖既鄉味。村  
酒亦天祿。盤羞及鼈裙。肴烝先豬肉。觴政設不苛。  
詩牌分已熟。如此會真率。絕勝強徵逐。及時善行。

樂無處非清福  
無隱庵和顧歿庵詩韻  
羣山四面來一邱踞其腹昔有風上人於此結茅  
屋丈室十笏寬左右繞修竹每於經禪暇坐飲山  
光綠上人既西歸其徒感風木仍結許由鄰不藉  
鄭詹卜我生厭塵囂野性同麋鹿短策折青寧長  
鏡劇黃獨跣然足音來如入逍遙谷

湯文正從祀文廟賦詩紀事

宣聖集大成朱陸乃分宗異同由此起勦說各唱  
喁偉哉潛庵叟仰板先哲蹤是朱非陸萬法一

賈鎔聖域得門入奚止闕及墉祇緣一孔論尚闕  
兩廡供我

皇重儒術尊賢若升庸劉宗先湯繼之祀典光辟  
靡春秋上丁日邊豆欽肅雍是邦有遺愛歡聲騰  
吳儂

春樊堯圃葦間共集吳玉松太守知魚樂軒

予因事未赴而分韻徵詩賦五言一章

道光三年冬十月十二日有客攜酒肴共扣吳翁  
室翁室新落成水木甚明瑟左圖右史間主人安  
且吉三人不速來而尚闕其一其一即我是有事



適他出乃為俗累牽未與賓筵秩作詩蝨其間聊以補亡失

立夏日集葦間太守齋中餞春

梅花先春開獨占一歲始羣芳次第來千紅及萬紫春來日遲遲春去若流水一聲杜宇啼忽報春歸矣素心三五人閒居共閭里主人卜良辰開筵集杖履舉酒盡三雅拈韻得四紙老夫年最高感春情不已

夏至後三日集同社諸子於五柳園即事成篇

四時相代謝節序屆長羸我心方憚暑秋氣忽已生涼風西南來竹樹襍有聲因懷素心侶尊俎設南榮山厨少蕪味草舍有餘清良會羅嘉客清言屏俗情相期各保愛守此歲寒盟

題席挹峯竹中人畫卷

修竹稟高節四時長不彫此中有佳士幽棲辟塵囂昔我識乃祖年方在齷髻視我如子弟植我如良苗尊公我齊年文史相招邀金蘭譜及君三世訂久要君本名家子玉樹凌雲霄性乃耽巖壑閉門甘寂寥坐擁書萬卷仰企黃虞朝歸真守其樸

不慕金與貂。老夫今垂暮。雙鬢秋蕭蕭。披圖念古  
歡感舊。託長謠。

游蘭亭

選  
纜舟越溪濱。言訪蘭亭迹。籃輿行山中。坐看羣峯  
碧。步入內史祠。庭宇頗幽僻。天寒紅葉稀。地潤蒼  
苔積。當門引曲水。磊磊疊奇石。清泉激石間。想見  
流觴客。右軍經世才。所志在忠益。常懷廊廟憂。匪  
抱山林癖。誓墓出危言。乃為時勢迫。駿烈謝禹鍾  
芳名垂竹帛。我來觴詠處。望古跂餘澤。重次修禊  
文。鐫石嵌諸壁。

彭葦間太守邀泛石湖即事成詩

方舟石湖濱。閑敞山人戶。中有范公祠。花木繞庭  
宇。摩挲四壁間。詩碣滿環堵。忽聞震雷聲。天外鳴  
如鼓。亂雲西北來。飄風挾快雨。彭公性好事。行厨  
設尊俎。二客尤與黃。無非素心侶。科頭且裸裎。脫  
略忘賓主。當筵舉觴政。雅令禱今古。分箋集詩牌。  
霏屑揮談麈。興盡促歸橈。微波送柔艣。詰朝各走  
筆。同把新詩補。

觀黃忠端公手書孝經

南海有大儒。忠節炳方冊。昔官勝朝季。謹言頻建

白不辭批逆鱗。但冀天心格。嗟彼崇禎主。視之若  
讎敵。初欲置之死。少寬尚遷謫。當其坐圜扉。翰墨  
手不釋。手錄孝經文。莊嚴脊波磔。誠公今好事。心  
重名賢迹。募工壽貞珉。檢校及點畫。適逢

聖明朝詔書。表忠魄。登諸孔氏門。從祀兩廡側。忠  
出孝子門。古人言不易。士雖不遇時。高風垂無斁。

吳江吳秀才以令祖古漁先生梅屋課孫圖  
遺像索題感舊懷賢率成長句

松陵有賢人。績學能稽古。發言成文章。如游羣玉  
府。昔予弱冠年。曾接邯鄲武。轉燭五十秋。風流散

如雨。文孫守家學。修德念其祖。手持梅屋圖。徵及  
齊東語。依巖結茆屋。書聲出環堵。古梅三五株。繞  
屋寒香吐。遐想山中人。高情忘圭組。常留歲寒心。  
用作高曾槩。

花間草堂疊菊成山。邀同人作東籬之會分  
韻得傑字

霜寒百卉凋。黃華英始茁。譬諸古逸民。歲晚見高  
節。二三素心人。款戶停車轍。幸此杖履來。因之尊  
俎設。合歡觴。徐行分韻鬪。爭掣招隱製。新詞延齡  
授。真訣昔聞陶處士。招携花下傑。舉酒酌東籬。懷

賢共怡悅

初冬集詩塘齋中觀趙忠毅公鐵如意邀春

樊詠菽同賦

秋菊晚餘芳。主人性好事。招邀素心友。同向花前  
醉。醉中懷古賢。手出鐵如意。此物非尋常。鑄自趙  
忠毅。銘詞及姓名。尚有戲金字。觀者手摩挲。懷賢  
愛其器。非器之為美。賢者有高致。昔公立朝時。有  
明世。將季奸璫竊國柄。政刑若兒戲。惟公秉大節。  
遂為世所棄。唾壺擊雖缺。莫遂平生志。古器今流  
傳。寶與球圖類。烈士不遇時。動輒遭猜忌。欲求如

我願人生談何易

孝子廬墓圖

人生非金石。老必歸山邱。孝子愛其親。常抱終身  
憂。依依不忍捨。結廬守松楸。夫豈好泉石。故為山  
澤遊。孝思真不匱。仰與曾閔儔。

題吳艾香遺照

桑梓有賢人而我未曾識。今從圖畫裏。古道見顏  
色。卓哉沈潛潛與彭豐豐。二老人中傑。相賞松石間。當  
時有遺墨。端人取必端。高風可追憶。

秋庭樂意圖為凌芝岩題

秋氣滿林薄。幽人懷故山。平生宦游迹。徧滿江淮間。行年八十餘。解組歸鄉關。故園有松菊。對此怡心顏。少歲勞王事。晚乃耽蕭閑。人生貴知足。清福天不慳。

七十生辰述懷

生人期百歲。七十古已稀。修途無盡境。久客當知歸。偉然七尺軀。於世一塵微。榮枯與修短。天定誰能違。老彭不世出。凡庸安可希。

西方有大士。曾現宰官身。宰官亦何貴。貴有濟物仁。衣食世所急。十室九憂貧。手無尺寸枋。何

以拯斯人。安得挽頽俗。同返羲皇淳。

古人不朽三。而我無一可。功德非易言。文章日頽墮。韓歐不可追。滿目糝糠歎。汲古注蟲魚。談天襲炙輠。獨學常寡聞。周旋我與我。

九秋風日佳。重陽節已過。黃庭菊花滿庭。嘉賓亦盈座。謂予馬齒增。舉酒共稱賀。回思總角交。一時賸幾箇。雙丸如飛輪。團蟻旋磨。

望雪

仲冬月既望。天氣暖若春。中田播麩表。膏澤需及辰。羲輪行北陸。陰凝道當馴。恒陽漫恒燠。其

咎豈無因。願將一瓣香。乞靈滕六神。祥翼集四野。萬彙資陶鈞。

初春集彭葦間太守汲雅山房

自結問梅社會友。常以文二三。素心侶直諒。蕙

多聞紫薇神仙職。耽詩悅邱壑。仇春樊竹林大

小阮述祖揚清芬。葦間及令姪清河老居士。繡

佛旃檀熏。張蔣塘大令况今廣川彦。新來張我軍。董

守太亮懷各抱月。清談皆于雲古人。有成言敬

業必樂群。良辰勿孤往。嘉會不厭勤。初春天氣

好。百草亦已薰。主人設尊俎。甘肥雜芳葷。情話

相蟬。但坐至夕。曛吟成共欣賞。飲少亦微醺。此

境不易得。佳話傳榆枌。

游吼山作

越山多平遠。此境獨出奇。舟行不知處。路入歧

中。岐峭石削成壁。草木多歲蕤。崑根坼圭竇。游

者爭先窺。空潭若明鏡。微風生漣漪。昔聞陶石

蕢於此。曾棲遲。讀書樓尚在。標題揭檐楣。倚欄

發長嘯。百谷聲相隨。地靈人亦傑。懷古寄遐思。

女史汪允莊明詩選題詞

古有采詩官。目詩見風俗。作者無他長。但取性

情足。漢魏六朝來。群賢繼芳躅。上下二千年。同  
工。非異曲。粵稽有明初。風雅尚可錄。吳門聚四  
傑。鸞鳳相聯屬。卓哉青邱翁。衆裡樹大纛。忽焉  
生崆峒。砥砒混良玉。滄溟復繼聲。菡苑中。配毒  
擬古画。葫蘆量才設。桎梏標榜。傾時賢。甘心受  
約束。狂瀾沸既久。誰與示正鵠。斯編精抉擇。詩  
壇一燈續。審音絕叫囂。辨色謝華縟。譬行昏衢  
中。忽覩光明燭。嗟彼朱及沈。未辨秋與粟。似此  
別真偽。庶幾稱寶籙。

秋九月同人入山放生潘芝軒尚書賦詩

紀事因和之

秋雨苦澆旬一朝。尋可喜。林準積霧收。風日甚  
清美。素心集十朋。共訪佳山水。携杖入西山。言  
尋方外士。山中叢桂發。所至開香市。野蔬蘊禪  
味。松風清俗耳。方舟載螺蛤。縱歸大壑裡。慈悲  
乃佛心。庖厨遠君子。推此一心往。萬物得生理。  
豈曰種福田。仁術本如是。

菊塲

環菊於几。疊成七層。上銳下豐。形与浮  
園相似。名之曰菊塲。而系以詩。

錢

今歲秋陽多。十月霜未落。玉衡已孟冬。黃華纔吐萼。花中此隱逸。賦性甘澹泊。主人愛成癖。徵求徧林薄。攜婦蕭齋種。髣几手度閣。重臺九層高。繁英五色錯。踈影任橫斜。冷香耐咀嚼。同心三五友。共踐東籬約。載賡陶令詩。徐設穆生酌。栽培瓦盆陳。燕賞金銀醪。相期晚節榮。即是長年藥。

題宋賢衛益齋先生墓志

昔有衛文節。史乘著賢名。表章朱子書。正學因之明。醴泉必有源。芝草非虛生。乃有益齋叟。文

行開先聲。青山成獨往。白社集群英。蒼、藟、蒿、山。當時有佳城。歲久莫封樹。荒土迷榛荆。賢哉吳興守。懷古有餘情。修古墓雖非古。好賢表素誠。高山心仰止。古詩聊載賡。

開元寺

城南開元寺。著自梁皇朝。寺有梁簡文碑中有二石佛。

西來乘海潮。莊嚴飾廣殿。傑閣凌雲霄。唐宋歷至今。歲月亦已遙。主者非其人。山門久寂寥。忽逢善知識。興復在一朝。長垣百堵興。嚴淨隔塵囂。門列四天王。威容重飾雕。象設耀金碧。旌幡



風飄飄海會十方聚。靈山一幟標。目緣有時節。勝業非倖邀。弗假衆生力。方知佛力饒。

集汲雅山房送臘分韵得開字

義輪窮北陸。三陽泰將開。東風徐入律。春信到庭梅。焮燈照虛耗。掃室除塵埃。家。醉司命。爆竹聲如雷。桃板換舊符。枿觴潑新醅。饋歲及親戚。羔雉往復來。老夫寧無事。坐守故紙堆。但耽文史足。弗慮年矢催。富貴迎非易。癡鼓賣亦該。世人祝如願。求福在不回。

題貝吉雲金石刻畫齋畫卷

我生愛金石。與子有同癖。考索篆籀文。蒐羅秦漢迹。追摹汲冢簡。遐訪嶧山石。瓦徵魏武臺。博購魯恭宅。凡物聚所好。故紙滿箱積。貪多襟真偽。振竒窮隱僻。之子三吳秀。嗜古若膾炙。樂石與吉金。入手能刻畫。不嫌雕蟲技。甘受文房役。雖云游於藝。與道亦大適。會當啟高齋。相對互考核。稽古證舊聞。因時希新獲。

題韓桂舫司寇題小寒碧畫卷

三吳諸閥閱。首數婁關韓。文懿署寒碧。芳聲著人寰。故家重世德。必有開其先。黃巖古賢侯。其

室標斯顏五傳至司寇管領六卿班庭堅掌邦  
禁明允克守官為政五十載仰者若斗山今及  
懸車歲解組歸林泉念典不忘祖蕭齋還舊觀  
琳琅東平筆高揭芝楣端詠詩誦先烈作繪追  
古歡徵詩徧朋舊采及芻蕘言

題王魚門風雨聯吟卮卷

我聞古詩人風雨思君子空谷有足音聞者心  
輒喜之子抱逸才聲華動鄉里結交多俊流商  
榷在文史良會不可常萍迹隨流水一片苔岑  
心寄諸香画裏修德必有鄰士貴得知已

送萬浣筠司馬歸江西

雅詩歌伐木古人重友生久聚一朝散豈無離  
別情況我賢父母膏澤在編氓明鏡懸虛堂折  
獄務息爭歲荒民無食飢溺中心繫議蠲復議  
賑萬室登安平黌宮久蕪穢土木親經營匠氏  
告訖功釋奠拜兩楹表章古賢守兩祠白公居  
鍾次第成鳩工濬海涵弗聞鼙鼓鳴百廢必具  
舉不惜囊金傾高堂有壽母翟第方尊榮金萱  
倏萎謝哀毀如孩嬰故廬在西江銜恤登歸程  
父老念舊德口碑留頌聲士林感教澤神君歌

載賡甘棠思召伯古今亦同誠都君有遺愛常在闔閭城

選

詠庭前梧桐

新綠滿林皋梧桐未萌蘖大材當晚成豈屑爭先出槃槃百尺身其用中琴瑟發為清廟音薰風嘗入律夏日苦炎熇清陰覆我室灼灼簇春花離離結秋實鳳皇棲有時樗櫟笑非匹嘉樹幸在垣及時早培植

選

蘭馨香為楊靜巖舍人題

蘭為王者香其德比君子南陔愛日心今古人同揆壽母在高堂晨夕羞甘旨世間生人樂何事能如此况有克家兒繡豸掌風紀父子異行藏而各成其是笙詩譜白華潔養斯為美徽佩非良貴吉祥在止止

忠仁祠

祠在西城廟堂巷祀明鄉賢徐公如珂  
舊有奉祠生歲久中絕近請於當路復之

蒼昊厭明德熹宗政不綱奄人執國命士類遭奇殃緹騎日四出衣冠坐銀鑪吾鄉周忠介作

吏頗循良。守官秉勁節。疾惡明剛腸。忽觸宵人怒。姓名列飲章。旗尉至吳門。聞者心倉黃。憤及市井民。義氣相激昂。一呼萬人聚。其鋒不可當。老拳集雞肋。醜類多夷傷。疆吏以叛聞。黑白誰叅詳。維時銀臺使。徐公曰念揚。恐肆蠅蟻毒。苦心為包荒。刑章不及衆。保茲梓與桑。哲人逝已久。百世常流芳。忠仁表其祠。歲時修蒸嘗。非徒香火緣。亦爭閭里光。

桂舫司寇家藏畫錦堂古銅印即席分韻

得韓字

印刻宋司徒兼侍中魏國公畫錦堂記傳於家十六字

仕官歸故鄉。昔人以為難。魏公畫錦堂。當世夸榮觀。惟公繼後塵。接武如邯鄲。服官五十載。一旦歸林巒。朋舊三五輩。招攜追古歡。清如乘軒雀。馥似同心蘭。手出古銅印。四座爭先看。篆文十六字。屈曲朱文蟠。後賢愛前賢。守器若守官。愛人及其器。歲久常堅完。佳話傳藝林。後先推兩韓。荒言作嗚矢。評跋在吟壇。

對花獨酌

積雨長莓苔。空庭綠如罽。萎花墮殘紅。點綴有生意。娟娟雙蛺蝶。頻就花邊戲。春光歲無幾。常

選

苦風雨至今朝。天氣清景物甚佳麗。且持一尊酒。獨對花前醉。

同社諸子虎邱山塘觀競渡。以一樓山對

酒人青句分韻得一字五言十八韻

道光歲丁亥重午又二日。龍舟習水嬉。士女傾城出。七里白公堤。遊舫如比櫛。老夫興婆婆。娑追歡有仇匹。社友相招攜。數等竹林七。良朋慶盍簪。嘉會欣促膝。中流一舟來。旌旗映雲日。兩舟復爭先。往來如梭疾。亦有弄潮兒。臨淵心弗怵。出沒波濤間。嬉笑聲洋溢。道旁有一叟。對此重

歎息。荆楚弔三閭。此地可不必勞民。復傷財。游戯甚無益。我聞啞其笑。公但知其一是。邦游民多覓食苦。無術藉此銷金窩。亦可寓任邱。獨樂衆樂間。此理耐窮詰。世有采風人。試聽芻蕘述。曉起書所見

東方天乍明。一陣廉纖雨。雨後雲氣清。初陽照庭宇。雙鵲立樹梢。迎風刷毛羽。不飛亦不鳴。徐行近廊廡。主人久忘機。物情自無忤。

吳淞圖為陶雲汀中丞題

東南古澤國。衆水趨歸墟。笠澤為其藪。百川於

選

此儲吳淞在下游泄之為尾閘湯湯潮與汶大塊氣吸噓洪流挾沙行所貴能杷梳因循歲復歲積泥遂成淤浩蕩萬頃陂欲泄無其途道光歲癸未靈雨十旬餘下民苦昏墊平陸成江湖萬家懸釜爨斯人且為魚問閭饑乏食縣官大蠲租災匪降自天厥咎在河渠中丞古房杜移節臨吳都苦心求民瘼首舉河渠書金錢大官出畚鍤烝人趨挾排祛壅塞指授忘勤劬吳淞三百里一旦利灌輸百吏頌成績兆民爭歡呼有作可無述賦詩復繪畫留示後來者慎勿忘

前謨而我心不歇尚抱區區愚禹貢稱三江水神關三吳江入震澤定其說良非誣鄞河白苑港島足無偏枯今雖舉其一請更反三隅及時議疏濬庶幾德不孤

選

潘公輔舍人在滄浪亭作放生會是日雨甚余未至作此奉簡

萬物在世間有生無不滅樂生而畏死靈蠢情如一養此生生機所仗仁人術吳城西南隅有水環如玦臨水林木繁孤亭翼然出潘子王謝流飯心向淨域天生慧業人而作善知識特舉

放生會與衆種福德胎卵濕化生普救無抉擇  
君子遠庖厨聖人慎釣弋推此愛物心積善寧  
有極

五老菑卷為陶雲汀中丞題中丞嘗作五  
老之會因繪為菑菑中潘丈奕雋吳太  
守雲韓司寇封皆在賓席僕亦附焉

昔有陶士行勲業八州督遥遥千餘歲中丞繼  
芳躅撫皖移吳門仁風扇蔀屋身忘金貂貴心  
愛林泉福樂樂不世材離羣立於獨  
矍鑠三松翁當世稱君子廿年鳳皇池手掌絲

綸美秋風感尊鱸未老歸田里流連止風月跌  
宕在文史瓊林兩度讌佳話儒林紀

延陵有嘉士早讀中秘書曾冠惠文冠出亦典  
郡符宦成歸思興七十乃懸車心厭城市囂家  
近青山居游戲鶯花間暮景聊自娛

尚書王謝倫弱冠通朝籍明允師庭堅志在辟  
止辟神武挂冠歸仁心卜安宅數典不忘祖小  
齋署寒碧天錫公純嘏歲寒顯松栢

我生。在田間。獨學苦無友。不啻樗櫟材。叨附羣  
公。後。倚裳復聯袂。因愛忘其醜。古來素心人。結

選

交多耐久齊心同所願仰止香山叟

虞山春望晉為陶雲汀中丞題

我生苦行後蹤跡徧九州虞山百里迹獨未探  
其幽今朝披斯畝林壑宛在眸峰巒如列屏暖  
翠雲中淨中丞今台杜曾此驅八駟所念在民  
瘼非關玩物遊常昭彈丸邑僻在海東頭古有  
白茆港潮汐所經由歲久泥沙積溝洫已斷流  
原田失灌溉重為農夫憂當官議興作入境勤  
諮諏歸來繪成畫利病心推求我聞古賢豪有  
志事必酬但恐衆論歧築室與道謀經營及畚

鍾利澤被田疇維桑必敬止請效輿人謳

臘八粥

嘉平第八日新月當上弦古稱王侯臘祀典先  
民傳是日佛成道說法非想天因此僧伽黎浴  
佛開法筵煮成七寶粥廣結衆生緣此事始北  
方吳俗近亦沿嘉蔬和百果凌襍同熬煎餽遺  
徧親戚惟恐乾餽愆猗與同社友嘉會等七賢  
消寒侑芳醴拈韻擘長箋脚分香積味頓使心  
垢掃藉此百福齋相與祈長年

人日集五柳園分韻得人字



開歲倏七日。小園風日新。池冰尚未泮。林鳥已  
鳴春。二三素心侶。嘉會及良辰。盤羞野人饌。門  
停長者輪。杯傾中山釀。詩繼少陵陳。俯仰一世  
間。萬事貴率真。消搖齊物我。脫略忘主賓。相從  
問梅社。同作詠花人。

吳棣華庶使招集池上草堂話雨分韻得

二字

皇天久不雨。萬物苦焦萃。仲春月既望。一朝時  
雨至。延陵有賢人。風雅敦交誼。門前鶴益集。池  
上瓊筵肆。僕夫雜蓑笠。浮人列餽餼。不憚泥塗

勞所喜。在農事。祥雲降。滕六協。風占巽。二天瑞。  
應時來。此事良非易。吾儕草間伏。坐享農桑利。  
一飲一啄間。無非天所賜。飽煖生人欲。惻隱古  
詩義。願陳霖雨詩。喜繼蘇亭志。

和尤春樊舍人七十自壽詩

丈夫志四方。夫豈戀林泉。顯晦各有數。行藏亦  
偶然。之子鸞鳳姿。健翮思凌煙。一朝謝塵網。逍  
遙歷歲年。菑史臚左右。花竹滿庭前。彷彿履道  
里。仰止香山賢。

桂船司寇小寒碧齋詩會題唐人王孟章

柳四賢象

我思王右丞。妙質瑚璉美。中年逢喪亂。遁跡兵戈裏。繪事啓南宗。道也進乎技。清辭如佛語。包括圓通理。論詩唐賢中。當先屈一指。

我思孟山人。生在開寶時。嘯傲公卿間。獨為世所遺。大名垂宇宙。一卷冰雪辭。風雅乃存道。詩壇奉為師。譬諸太史書。託始在伯夷。

我思韋左司。秀挺霜中筍。少登游俠場。中歲乃證果。當其守蘇州。萬民呼作爹。消搖燕寢間。埽地焚香坐。至今三儂流。奔走奉香火。

我思柳柳州。本是席上珍。生世既不諧。哀怨追騷人。文章埽糠粃。抗志師周秦。治績亦循良。化洽瀟湘濱。黃蕉丹荔間。至今奉為神。

題問梅詩社圖有序

城西積善院有古梅一株數百年物也道光癸未仲春之月黃子堯圃偕尤春樊舍人彭葦間太守探梅至此乘興欲結問梅詩社邀予入社每月一會會必作詩其後士大夫歸田者相繼講苔岑之契則有張大令蔣塘朱贊善蘭友韓

司寇桂舫吳廉訪棟華潘農部理齋而  
董琴涵太守卓海帆京兆在吳門時皆  
來赴會乃菟圃已先歸道山矣己丑夏  
日哲嗣同叔出此圖見示蓋菟翁于初  
結社時所作撫今追昔不勝白社黃壚  
之感因賦一詩并索諸同人和之

幽禽集喬木尚多求友聲人生宇宙間豈可無  
友生黃子今好事懷古多幽情清襟抱冰雪合  
與梅同盟因梅乃結社敦盤翕羣英倡予復和  
汝裘葛倏七更斯人不可追斯事今載贖八音

合成樂孤竹乃先鳴

同人集五柳園賞菊

羣芳占四時最晚莫如菊譬諸山澤癯默處在  
空谷我家五柳園新築花間屋疊石成小山蔣  
花滿其麓四圍錦繡叢五色雲霞簇花徑客偕  
來山厨酒正熟盤餐無兼味齒頰有餘馥酒盡  
歡有餘卜晝不繼燭詩和彭澤陶賦愛甫里陸  
邀茲同社人雲龍試追逐

題明嘉定州朱公家傳

往歲遊西川蜀人述舊聞明季政不綱都邑遭

寇氛維時漢嘉郡有官矢忠勤一方資保障萬  
戶稱神君大厦一木支籌策空紛紜寇深可若  
何力竭乃自焚闔門既同燼百世長流芬華胄  
名雋才大雅卓不羣幽光發潛德考信徵雄文  
聖世表忠烈馨香祖桓薰  
旌門樹綽楔光寵在榆枌

人日集吳棟華廉使池上草堂

自結開梅社已歷春秋七香山慕九老竹溪思  
六逸共敦縞紵交常入珠蘭室二三素心人容  
我其脚蝨心如雲憶泥誼若膠投漆禮數捐煩

苛笑言取真率歲行在庚寅良會逢人日延陵  
有賢人開筵陳鼎寶擊鮮雜雞豚飮座臚橘栗  
序賓但燕毛密坐真促膝台歡酒無量分韻詩  
有律聽松風生籟吟梅香沁筆雅令投明瓊妙  
句彙緗帙舊草積薪多新篇抽繭出自緣古歡  
深豈等野處暱

竹堂類稿卷三下

五言古詩四

題王生壽康還讀畧

士生宇宙間常與富貴期此事不可強藏器且  
待時先聖有彛訓垂為百世師六經為綱領百  
氏皆神奇書囊信無底所貴人思維儒者執所  
業一物恥不知學古乃有獲餘事在文詞掘井  
須及泉繅繭方成絲光陰競分寸所戒荒於嬉

鄒小山百花畧卷為願湘洲題

南方多草木厥狀盈千萬誰歟生花筆一一開

生面梁溪有賢人官列秘書院芳心等葵傾妙  
技效芹獻丹青奪化工觸手羣芳現種分五色  
新體備四時豔一花繫一詩百樣品題徧畫成  
不敢私拜獻南薰殿  
天顏有喜色嘉獎託豪翰賦成柏梁篇星雲同  
糾縵名蹟登上方粉本自留玩流傳好事家披  
卷人欽羨因思  
純皇朝金閨集俊彥一技不肯遺務令及時見  
詩畫雖小道亦荷  
天垂眷區區小草心感此起三歎

顧野王祠堂

少時讀玉篇早識黃門顧黃門名家子被服守  
儒素讀書先識字元覽啓神悟古文及奇字約  
略窮其趣名冠千人英心游九經庫維時宣城  
王開府揚州住元僚登盛府才名推獨步梁室  
既板蕩叛臣為國蠹慷慨從義師艱難贊戎務  
嗟哉文武才磊落天所付生世既不諧牢愁向  
誰訴巍巍句吳城蔀屋不知數城西濠濮間烟  
火萬家附倬彼黃門祠閑闕臨大路鬱攸忽為  
灾守者失防護幸哉子孫賢舉族醵泉布土木

計重新輪奐美如故古云桀與梓敬恭不敢斲  
况兹先耆人執鞭亦欣慕稽古復崇德不禁長  
言賦

甘露花邀同社諸公賦

甘蕉性叢生非艸亦非木植我書窓前綠陰覆  
茆屋頻年時作花客至驚相矚今歲發五花化  
工故亭育一日一瓣開源源相繼續十旬猶未  
已耐久此花獨鼓頰含甘漿崖蜜無其馥清芬  
沁心脾不數祀與菊同人集蕭齋對此忘炎燬  
願乞詩人詩爾音賁空谷

送陳芝楣轉運之官粵東

卿雲在天上舉世以為瑞來去雲無心蒼生澤  
同被憶昔使君來巖巖專城寄布政示優游愛  
人先撫字觸豸陟外臺掌庾愾羣吏今復拜  
朝恩移節海南地海南地華離其人善居積萬  
衆業牢盆度支事非易風俗縱妖浮君去定民  
志吳儂多去思重望霓旌至

初冬集彭葦間太守一卷石齋分韻得寄

字

拜石呼石兄米顛本游戲壺中歲九華亦見雅

人致彭子閱閱家經義為治事當其守武陵世  
稱清白吏心慕陸鬱林載石作歸計蕭齋十笏  
寬高揭擘窠字齋名一卷石願名當思義君子  
介如石三公易不易問君然不然君曰是吾志  
良辰設樽俎嘉會集車騎諸子皆石交苔岑敦  
夙誼明朝風雨中彼此詩筒寄

選

桂齡二兄招集種梅詩屋詠園中鶴得化

字

鶴鳴在九皋本屬仙人駕一朝攬德輝翩然自  
來下主人愛其潔畜近梅花榭履石啄蒼苔厥  
貌甚閒暇因思乘軒客丹青贊神化羽毛蹤自  
愛或遭弋人射何如在林泉常與紅塵謝逍遙  
物外游清福真無價

池上草堂詩會以冬暖為題得日字

幽風序四時曾述二之日祁寒生怨咨聖主必  
存恤何幸四九天和氣尚洋溢大裘屏弗御堂  
花臚滿室造化本無私德盛常逢吉人懷趙卿  
政地協鄒生律扶陽以抑陰調燮豈無術在昔  
春無冰亦載麟經筆

題蘇文忠公草書醉翁亭記卷



歐陽守滁州其年未四十自署呼醉翁原出游  
戲筆智仙僧中豪作亭兩山隙亭以醉翁名鴻  
飛雪留迹一記傳千秋文藻光巖穴醉翁門下  
士大蘇推第一健筆走龍蛇深入晉賢室斯文  
得斯書今古歎雙絕歷今七百年宛如趙家璧  
我昔居巴蜀獲逢此寶墨詫為希世珍愛之手  
不釋彼人方居竒兼金不能易移官至濟南此  
卷復相植翰墨有因緣終為我所獲此卷隆慶  
間文氏曾摹刻歲久石已亡舊拓不多得何圖  
後死者親見此手澤熏香箴巾箱古錦十重襲

題梁蔭林方伯練湖三畜

我家本丹陽地處練湖側盈盈一水間芒屨屢  
攀陟農田資灌溉轉漕亦利涉宣防有司存歲  
久失其職上湖變成田下湖亦淤塞使君來旬  
宣先務講溝洫履勘至再三定識祛衆惑地勢  
擇其宜鳩工期必刻一朝兩牘成啟閉垂定則  
舟行通無阻水利及稼穡邦人歌且謠常頌使  
君德

張迪民僧裝小像

迪民我畏友多聞兼直諒當世推循吏士林仰

令望學儒又學佛深入華嚴藏故以居士尊而  
現衲子相獨契三乘微弗留一塵障猗彼永康  
祇遺愛永弗忘俎豆賢人間寔出中心貺萬家  
祝生佛若奉如來樣積此最勝緣靈山蚤回向  
嘉名在世間如佛壽無量

人日同人集五柳園

開歲倏七日今朝天放晴堂花增麗色林鳥變  
春聲良朋二三輩把酒話平生去年洛水災鴻  
雁多哀鳴天心素仁愛悔禍豈無情野人無所  
願但願歲豐盈河清人亦壽長此心太平

朱蘭友贊善招集水雲四抱之軒分韻得

水字

我聞古詩人風雨思君子相思輒命駕不憚遠  
千里況今素心人芳蹤在尺咫良辰赴嘉會杯  
盃盪甘旨幾輩濯纓人共詠滄浪水春風苦多  
庸老夫病初起強歌無歡聲操觚愧率尔

太倉汪生餉水蜜盃賦此寄謝

昔聞度索山有桃能結子羣仙作高會開宴瑤  
池涖即今婁江東種桃徧田里其味賽蜜甘其  
形與盃似毋乃古仙人遺種留於此汪君今好

事寄此兩包。匪嘉果冠時新，入手心先喜。芳馨通鼻觀，甘漿沁牙齒。名媿安期棗，品勝王戎李。長吟百字詩，飽德志其美。

贈彭詠菽舍人

尚書斗山尊，昔我承明誨。轉燭六十年，復見後生輩。君抱瑚璉器，英奇邁羣隊。克家繩祖武，幸有典型在。荆山產良璧，懷寶先自愛。居易以俟命，勿計顯與晦。委心任運行，百事少尤悔。願采芻蕘言，權作韋絃佩。

題韓司寇種梅第三首

昔有童二樹，畫梅一萬幅。一幅一篇詩，篇篇若珠玉。天生百卉中，此花最幽獨。所以愛花人，於梅好尤酷。尚書燕許流，仙骨超凡俗。愛梅入骨髓，種梅繞書屋。自號種梅農，如農植嘉穀。詠梅壽梨棗，畫梅費紈縠。一啣心未已，二三先後續。聚作問梅詩，縹緗仍著錄。

十月四日集同人作東籬會

百花類甚繁，淵明獨愛菊。菊非有殊艷，所喜性幽獨。譬諸避世者，芳蹤在空谷。騷人餐落英，清芬滿其腹。嗤彼肉食流，但知饜梁肉。何如集嘉

客同享此清福

題王臨溪明經出處語默四首

士生宇宙間所志在四方  
乘弧與蓬矢意氣常  
激昂懷抱瑚璉器作貢  
登廟堂才高命不齊  
動逢角與張西望長安  
笑區區心不忘

右長安走馬

菰蘆有嘉士家住東海濱  
壯游既已倦環堵安  
其身昔聞任公子手握  
百尺綸一釣連六鰲  
豪氣真無倫夫君掉頭  
去當與結為鄰

右滄海垂綸

文章雖小技古稱載道器  
笙簧在六籍中有微妙  
義儒墨互短長朱陸表  
同異俗士矜咫聞經  
生趨私智不有善知識  
奚以闢羣議

右尊酒論文

淨名無言詮達摩六面  
壁多言或數窮不如守  
其默鍾期不常有古調  
誰能識所以碎琴人甘  
心處岑寂昭文不鼓琴  
此義不易析

右停琴佇月

題故方伯廣公盛世良音  
冊名廣玉

山岳挺令姿圭璋蘊文府  
道氣備四時精心燭

千古觀稼巡西疇延薰對南浦執弓表正直吟  
雪耐清苦詩詠甘棠新像繪凌煙古試述公生  
平事、不踰矩昔公起家年鳳池耀毛羽妙手  
習國書沮誦不足數崔靈重門才房杜本玉佐  
歷官徧中外抱器兼文武防秋甌脫空救災膏  
澤普萬流仰水鏡四境絕桴鼓冤魂識神君煩  
言懇庭廡異聞萬口傳嘉績

九重許繡衣行海隅其地古沃土公携百硯歸  
此外一無取

帝心由茲簡我民汝綏撫八閩及兩浙經畫成

治譜公益堅初心志不在華膺丰裁迅秋肅惠  
澤熙春煦我本山林人埽田六寒暑公時却騶  
從枉駕過衡宇察吏訪龔黃問政評齊魯但采  
輿人謠不責亭公弩論事無妄言敢借一鱣賂  
韋曲尺五天雲臺文二組竊效淵明筆操觚志  
良輔

道光癸巳秋重遊泮宮作

吾年十有八廁身衿佩中維時方志學尚未離  
童蒙彈指六十年白髮成衰翁重逢癸巳歲瞻  
拜耒耜宮二三總角交苔異岑則同老馬久伏

櫪俊翮方培風我鄉本才藝豈無命世雄雲梯  
纔初步後望將無窮却思彭相國兩者垂青瞳  
菲材若小草敢忘時兩功

潘功甫舍人以藏雲二字古銅印見貽詩

以報之

卿雲在天上霖雨徧蒼生閒雲歸故山乃與泉  
石盥顯晦雖異軌在雲無二情宇宙有元氣萬  
類資生成退藏歸於密得介始完貞世有善知  
識此義可證明

為蘇曉山題蕤鄉奉母菑

眉山有二蘇當世稱妙才至今八百年衆拱若  
斗台雲初有精苗風雅世所推春風奉板輿來  
住吳山隈吳中好山水清遠離塵埃樹萱在北  
堂采蘭陟南陔蕤羹供潔養人皆稱孝哉披菑  
祝壽母作歌賡臺菜

王貞女詩

羽蟲三百六鵠與雁無差鵠性生而淫雁性貞  
不移物情既不齊生人亦如斯琅邪有息女子  
婦趙氏子夫也既不良媪又老無恥桑中暱金  
夫醜行同犬豕誘女女不從慎保千金體強暴

弗能犯守身繼以死柏臺有良吏采聽及臚言  
虛堂懸明鏡照見覆盆冤手持三尺法誅奸慰  
貞魂封章達  
九重綽楔旌其門鴻文鐫樂石香名終古存嗟  
予禿炷年萬事置不問忽聞此異聞心喜復心  
愠勿謂匹婦賤網常繫彘訓采風太史職表章  
是吾分

六言古詩

放言

仕宦至二千石古人以為榮名今我忽忽不樂毋  
乃不近人情男兒墮地有志此意真如耳鳴獨知  
不能共喻他人安得相爭我生四十有五平生有  
志無成文不能調台鼎贊襄密勿承明武不能握  
兵符風雷號令施行坐守一州斗大消磨秋蟀春  
鷓何似拂衣歸去江湖放浪餘生杞菊一廬偕隱  
鷗波萬里同盟

魏世苑以回題

魏何以能大羅其說就故家餘也所端一龜如對

其於風雷發今詩行其於一其子一龍其其卷

之無故又不論謂公原書其卷也其取書不端

不論其論其人於其時其故其四十有九其其者

公不其人其其其其其其其其其其其其其其


其其其其其其其其其其其其其其其其其其

效言

六如如樂

Blank manuscript page with vertical lines.





A rectangular area on the right side of the page, bounded by a thick black border, contains ten vertical lines for writing. The lines are evenly spaced and extend from the top to the bottom of the area. There is a small, irregular mark or tear near the bottom right corner of this area.

